

Labari kpa n bo MARAKO akerε i ni

Kabo Yohane Nyeme Nzue Biefo kaanri Nyeme jore ni

¹ Ahin jore ni, i ti Nyeme Wa Yesu Kristo dee labari kpa n wo. Kabo i boori i bu yaa. ²⁻³ Nyeme yo seeri i wa n ka,

“Ti fen, m sunma m sunmafo n na i du u mo,
yiri sese u atin n su a.

Yiri ko subo ndoori boro kpantain n nu se ka,
‘Am sese Mibie n atin n su,
na am yo i atin n dogu.’ ”

Na Nyeme ama ba kere nyini jojowa n kere Nyeme noanie kanfo Esaya dee kadasi n nu.

⁴ Nyini sono n bo Nyeme sunmaari i n la sono be bo bu fere i ka Yohane Nyeme Nzue Biefo ni. I baari boro kpantain n nu, na i sukan Nyeme jore, i na, “Am kaaki am wo na m bie am Nyeme nzue, na Nyeme fa am ngasi ni am satie kere ce am.”

⁵ Na Yudiya asiensufom, ni Yerusalem mie nufom kere afite aba i do, na ba kan bu ngasi ni bu satie kere bo ba yo i akere Nyeme, na Yohane abie bu Nyeme nzue Yodan kunma n nu.

⁶ Yohane sutura wuraawa yo ti deke bo bu faari nyoma ndore wuuri i a, na wo fa jina abo i wi nu. I diire yo la lalom ni wie wo. ⁷ I kaanri Nyeme jore, i na, “Sono be wo m sin suba, i tara

m fieo, m ti kaan ni bo m dodo i. ⁸ Mini afa nzue abie am a, na am yo casi, ama, yiri fá Nyeme Awiewie Casi n wura am ñu yo am casi a, kabo sonó bie nzue na i yo casi ni.”

Kabo Yohane bieeri Yesu Nyeme nzue ni

⁹ Nyini sangá n na Yesu afite Nazareti, mie n bo i wo Galili awore n nu ni, na wo ba Yohane do, na Yohane abie i Nyeme nzue Yodan kunma n nu. ¹⁰ Sangá bo Yesu fiteeri nzue n nu ni, kpenga na wo ñu ka angoro n ateke, na Awiewie Casi n ajura ka tiiwa dee su aba atana i ñu. ¹¹ Na wo ti akonvi be ñga angoro, i ña, “Woro ti m wa a, m koro u agaya, m ahore ajo u ñu.”

Kabo Sitana yoori Yesu na i nie ni

¹² Nyini jinaabiri n nu na Awiewie Casi n ama Yesu ako boro kpantain n nu. ¹³ I woori do een aburana, i ni boro nengem woori do a, na Sitana ayo i na i nie ka, i yo yiri Sitana n dee koroowa, nzen i yo má. Ama, Yesu asoro má su. Na Nyeme merekem aba asu i.

Kabo Yesu fereeri jombaa tarafó nna nbem ka bu su i su ni

¹⁴ Sangá bo bu taraari Yohane nyiiri i dan-saraka n sin, na Yesu ako Galili awore n nu, na i sukan labari kpa n fa ko Nyeme atin n su kere minem, ¹⁵ i ña, “Sangá n aju bo Nyeme Feme bá nie i minem su. Am kaaki am wo, na am de Nyeme labari kpa n na am yo i yarada.”

¹⁶ Ye i ba sunati sin Galili kunma kpiri n noo su, na wo ñu jombaa tarafó nnyo nbem. Bere la Simon ni i niema Andere. Bu wo bu diendie sandi su kunma kpiri n nu. ¹⁷ Na Yesu ase bu ka,

“Am bra na am ba su m su, na m má am tien minem nɔɔ ma m, kabo am tara jombaa ni.” ¹⁸ I seeri sɔ ni, na ba kaba ayaki bu diendiem ni, na ba su i su.

¹⁹ I nati kɔɔri mɔ kaan bekun, na wɔ ɲu mine nnyɔ nbem. Bere la Yakobo ni i niema Yohane. Bu fere bu si ka Zebedi. Bu wo lee nu suyo bu diendiem dɔngɔ. ²⁰ Dɔ na wɔ fere bu ka bu su i su, na ba yaki bu si ni, ni i npaadifom n lee n nu, na ba su i su.

Kabo Yesu fɔn yiiri ajini sɔnɔ be ɲu ni

²¹ Na ba kɔ aju miɛ kpiri n bo bu fere i ka Kapenam su. Na Yudafom Numiya cɛen na Yesu awura bu tientienbunɔɔ sɔɔ n nu, bo bu sere Nyeme na bu kere Nyeme jɔre nu ni, na wɔ kan Nyeme nɔaniɛ akere minem ni. ²² Na bu kere ayo alekutura fa kɔ i kereewa n su, dama i kereewa n awo i ɲgumi ni Yudafom dɛɛ Nyeme nɔaniɛ kerefom ni. I kereewa n la yiko. ²³ Nyini sangga n nu na sɔnɔ bo ajini wo i ɲu n aba bu dɔ bu tientienbunɔɔ sɔɔ n nu, na wɔ bo awie ²⁴ ase ka, “Yesu Nazaretifo, a koro nzu ya nu fen a? A ba ka a ba yo ya ɲgbɛɛn wɔ? M si u sa, wɔɔ ti sɔnɔ casi n bo Nyeme asunma u n a.” ²⁵ Na Yesu atien ajini n ɲu ase ka, “Mɔ u nɔɔ bere, na a fite yaki sɔnɔ ni.” ²⁶ Na ajini n akpisi sɔnɔ ni, na wɔ ciindi afite ayaki i. ²⁷ Na minem kere ayo alekutura akɔ asin su, na ba bisa bu ɲuɲu nu ka, “Ee. Nzu la ahin? I ti kereewa fɔfɔre wɔ. Ahin sɔnɔ n la yiko bo i koro ma ajinim n mmɔɔ nɔɔ na bu de i.” ²⁸ Nyini ti na Yesu duma akaba ata abara aye Galili awɔre n kere nu.

Kabo Yesu tuntuunri tukpakifom beberebe Simon dika ni

²⁹ Saŋga bo i fiteeri tientienbunoo soo n nu ni, na i ni Yakobo ni Yohane ako awura Simon ni Andere dika. ³⁰ Bu ko juuri awuru n nu ni, na ba se Yesu ka Simon sibara la má i ŋu, yakoko abo i, i da sooo. ³¹ Na wo ko aso i saa nu aye i su atana, na yakoko n ayaki i, na wo ko ayo diire ama bu.

³² Nyini ceen n naaso, dika bibiri saŋga, na minem afa tukpakifom kere ni minem bo ajinim wo bu ŋu n aba Yesu do. ³³ Na mie n nu jama n kere aba atien bu noo i do anungbere n nu. ³⁴ Na wo tuntun tukpaki barasu barasufom beberebe, na ba nya laifie, na wo fon ayi ajinim gusu beberebe. Wo du má su na ajinim n joo, dama bu si i sa.

Kabo Yesu kaanri Nyeme jore Galili awore n nu ni

³⁵ Na alecin akonyuma ciciri su, na Yesu ayasu afite ako dede awore be nu i ngumi, na wo ko asere Nyeme. ³⁶ Na Simon ni i bengum ako i nienie. ³⁷ Bu ko ŋuuri i ni, na ba se i ka, “Sono kere sunienie u busu.” ³⁸ Na Yesu ase bu ka, “Am ma ya ko mie nyingam n su na m ko kan Nyeme jore kere bu gusu, dama ka nyini ti ye m baari durunya n nu a.” ³⁹ Na wo bara aye Galili awore n kere nu, sukan Nyeme jore bu tientienbunoo soom n nu, ye i fon yi ajinim minem ŋu a.

Kabo Yesu tuntuunri kokofa be ni

⁴⁰ Na kokofa be aba Yesu do, na wo ba akutu i nyunu asere i jande ka i buka i. I ŋa, “Nzen a koro ka a ma m nya laifie, a koro ma m nya i.”

41 Na Yesu anu i anunfo, na wo tenge i saa anana i nu, na wo se i ka, “M koro. Nya laifie.” 42 Na kokobi n akaba ayaki sono n na wo nya laifie. 43 Na Yesu ama i atin ka i ko, na wo bobo i 44 ase i ka, “Ma a se ka a se be ahin jore ni, ama, ko na a ko fa u nu kere Nyeme sayoowa dɔnguyofɔ ni, na a ko yo yoowa n bo Moyisi yo kereeri dawafom ni, dama nyini kere minem ka a nya u nu a.” 45 Ama, na wo ko abo ndoori, na labari n abara aye deke n kere, nyini ti, Yesu akoro ayi ma i nu fofoe nu miem be nu kun, i fiɛri i nu aheme wo, na mine afite awore n kere nu aba i do.

2

Kabo Yesu tuntuunri sono bo i saam ni i jaam awu ni

1 I yoori lennyo na Yesu akpie i nyi aba Kapenam mie kpiri n nu, na labari abara aye ka i wo awuru, 2 na mine atien bu noo i do agaya haari fofoe anya ma ano n bo bu fa wura soo n nu mmoo, na Yesu akan Nyeme jore sukere bu. 3 I wo bu kere su ni, na mine nbem aba i do, bu nu mine nna so sono bo i saam ni i jaam awu. 4 Jama n sunnuuri so n deɛ ti, ba koro anya ma fofoe bo bu fa sono n dodo Yesu, na ba fiiti soo n bo Yesu wo nu n angoro buekun, na ba fa i ni i dasu n kere accɔndi afa i ada soo n nu. 5 Yesu nuuri kabo bu yoori i yarada n so ni, na wo se sono n bo i saam ni i jaam awu n ka, “M don, ma fa u satie ace u.”

6 To. Yudafom Nyeme noanie kerefom nbem tana bere, na ba sunsun bu ahore su ka, 7 “Ahin sono n la atin bono ye i joo wura Nyeme ngasi

nu so a? Be wo má bere bo i koro fa minem satie ni bu ngasi ce, sin Nyeme nu.” ⁸ Na Yesu afa nu i ahore su fa ko bu sunsunni bo bu bita i n su, na wo bisa bu ka, “Nzu ti ye am bita nyini sunsunni ni am ahore su a? ⁹ Bonɔ ti kekereke a, bo m se sonɔ n ka, ‘Ma fa u satie ace u,’ nzen, ‘Yasu fa u dasu n na a nati n a?’ ¹⁰ M kére am ka mini Adamande Wa n la yiko durunya n nu bo m fa minem satie ni bu ngasi ce bu.” Na wo se sonɔ n ka, ¹¹ “Woro, yasu fa u dasu n na a ko awuru.” ¹² I kaba yasu faari i dasu n wo, na wo fite jama n kere nyumbaa nu. Na bu kere ayo alekutura, na ba kansi Nyeme, na ba se ka, “Ya nya nu má ahin sa n nusu ceen be.”

Kabo Yesu fereeri Levi ka i su i su ni

¹³ Na Yesu akaaki akpie i nyi ako Galili kunma kpiri n noo su, na jama beberebe ako atien bu noo i do, na wo kan Nyeme jore akere bu. ¹⁴ I wo natiiri su susin ni, na wo nu lampodefɔ be bo bu fere i ka Levi, Alafeyo wa ni, ka i tana i juma yoobiri, na Yesu ase i ka, “Yasu bra na a ba su m su.” Na wo yasu asu i su.

¹⁵ Na Yesu ako Levi dika ka i ko di diire. Na satieyofom, ni lampodefom beberebe asu i su. Diire n diibiri do ni, na bu dongu aba atana Yesu ni i susufom n do, na ba sanɔga adi diire. ¹⁶ Na Nyeme noanie kerefɔ nbem bo bu su Farasifom deɛ atin su ni, anu ka Yesu ni satieyofom, ni lampodefom tana sudi diire, na ba bisa i susufom ni ka, “Nzu ti ye Yesu ni lampodefom, ni satieyofom sanɔga di diire a?” ¹⁷ Na Yesu ati bu jɔjɔowa n na wo bo bu nu ka, “Minem bo bu la laifie n koro má ayirifo, má ka

bo bu la má laifíe ni koro a. Ma ba má ka m bá fere minem bo bu ña bu yo sa bo i kó atin su Nyeme dɔ n wɔ, ama, m baari satieyofom n dɛɛ ti wɔ.”

Kabo Yesu kereeri nɔɔ cici jɔre ni

¹⁸ Cɛɛn be na Yohane dɛɛ susufom ni Farasifom sucici bu nɔɔ, na mine nbem aba na ba bisa Yesu ka, “Nzu ti ye Yohane susufom ni Farasifom dɛɛ susufom cici bu nɔɔ, ye u dɛɛm bere cici má?”

¹⁹ Na Yesu abɔ bu nu ka, “Am sunsun ka konyayafom koro cici bu nɔɔ sanɔa bo konyafan n toko wo bu dɔ ni, nzen sɛ? Ai, sanɔa bo konyafan n wo bu dɔ ni, bu yo má nyini. ²⁰ Ama, sanɔa suba bo bu bá yi konyafan n fite bu nu, nyini sanɔa n ye bu nyá cici bu nɔɔ a.”

²¹ Na Yesu akaaki ase ka, “Be koro fa má sanvuin fɔfɔre kpa tɔ má tani dawa kunma, nzen i yoori sɔ, sanvuin fɔfɔre ni sɔn tani dawa n wɔ, na i téke i kunma n agaya buka su. ²² I kaaki ti sɔ ɔ bekun ka be koro fa má nzan nyiiwa fanɔafo go má dundu dawa bebete nu, nzen i yoori sɔ, dundu ni tíe wɔ, na i ká ngbeen, na nzan n kere sóngi. Ama, i ti ye ni ka bu fá nzan nyiiwa fanɔafo go dundu fɔfɔre biiwa nu.”

Kabo Yesu jɔjɔ fa kɔɔri Njumiye cɛɛn n jɔre ni

²³ Yudafom Njumiye cɛɛn be, na Yesu ni i susufom ni sunati sin alɛmbaa fie be nu, na i susufom n abubu be akpɛsɛ. ²⁴ Na Farasifom n ase i ka, “Niɛ fɛn. Nzu ti ye u susufom ni suyo sɔ a? Nyeme nɔaniɛ kpamaawa n kere ka má be yo sɔ, Njumiye cɛɛn ni.” ²⁵ Na wɔ bɔ bu nu ka, “Am nya kan má Nyeme Jɔre Kadasi n nu,

kabo Feme Davidi yo yoori sanɓa bo i ni i minem miɛeri diire busu n wo, nzen se? ²⁶ Nyini sanɓa Abiyata yo ti Nyeme sayoowa dɔnguyofom kere kpien n a. Ahɔe n ti, na Feme Davidi ako awura Nyeme Sereebiri Awuru n nu, na wo di kpono n bo ba fa ama Nyeme ni, na wo ma i minem be. Ama, am si ka ya dɛe atin n su, Nyeme sayoowa dɔnguyofom ngumi di nyini kpono n a.”

²⁷ Na Yesu akaaki ase bu ka, “Adamande dɛe ti ye Nyeme yiiri Numiyi cɛen n a, má Numiyi cɛen n dɛe ti ye Nyeme yiiri adamande a. ²⁸ Nyini ti, Numiyi cɛen ni mmoo, mini Adamande Wa ni ti i Mibiɛ a.”

3

Kabo Yesu tuntuunri sɔno asaa fuin be Numiyi cɛen ni

¹ Na Yesu akaaki ako tientienbunoo soo n nu do bekun. Sɔno asaa fuin be woori do. ² Na minem bo bu wo do n atu bu nyumbaa anie Yesu, na bu nie ka i tuntun asaa fuin n Numiyi cɛen ni, nzen i tuntun má i, adena bu só i ngeɛ na bu járaki i ka wo saaki Numiyi cɛen n ciire ni. ³ Na Yesu ase asaa fuin n ka, “Ba jina afien fen.” ⁴ Na wo bisa bu ka, “Ya dɛe atin n su, atin wo nu ka ya yo sakpa Numiyi cɛen ni, nzen ya yo satie wo? I kaaki ti ye ni ka ya de ngoo, nzen ya yi ngoo o?” Ama, ba bo má i nu. ⁵ Na Yesu anie bu nyunu abara aye, na wo fa yaa bu nu, na i ahore asaaki fa ko bu atii kekere n dɛe ti, na wo se sɔno n ka, “Tenge u saa ni.” Na wo tenge i saa ni, na wo yo fanɓa bekun. ⁶ Na Farasifom n akaba afite tientienbunoo soo n nu ako Feme Herode minem

dɔ, na ba sɛsɛ bu ɲu su kabo bu yó na bu kún Yesu.

Kabo jama beberebe tiɛnri bu nɔɔ Yesu dɔ ni

⁷ Nyini sin na Yesu ni i susufɔm n afite akɔ kunma kpiri n nɔɔ su, na jama beberebe afite Galili awɔrɛ n nu asu i su. Nbem gusu fiteeri Yudiya dɛɛ awɔrɛ n nu, ⁸ ni Yerusalem miɛ kpiri n nu, ni Idumeya dɛɛ awɔrɛ n nu, na nbem gusu afite Yodan kunma n wiɛ afiiri ni, ni Tiro ni Sidon dɛɛ bue ni. Bu tiiri kabo Yesu yoori alekutura sam barasu ni, nyini ti ye bu baari i dɔ a. ⁹⁻¹⁰ Yesu ama tukpakifɔm beberebe anya laifɛ n dɛɛ ti, bo bu la tukpaki kɛrɛ koro ka bu miɛ bu nyi wɔ, na bu sakati wura na bu fa bu saa kan i. Nyini ti, na wɔ se i susufɔm ni ka bu kpa bu ɲu ni lee ma i, na nzen minɛm ba ɲa bu miɛ i ɲu na i koro wura lee n nu. ¹¹ Saɲga kɛrɛ bo minɛm bo ajinim wo bu ɲu n nya ɲuuri i, bu kutu i nyunu wɔ, na bu ciindi na bu se ka, “Wɔrɔ ti Nyɛmɛ Wa n a.” ¹² Na wɔ bɔbɔ ajinim ni ni anyumboro ka, má bu ma be si i sɔnɔ nzuin nu.

Kabo Yesu yiiri minɛ buru ni nnyɔ ka bu yo i jaramasam ni

¹³ Na Yesu afun akɔ buka be su, na wɔ fere minɛ n bo i koroori ka bu ba i dɔ ni, na ba ba i dɔ. ¹⁴ Na wɔ yi bu nu buru ni nnyɔ, na wɔ fa bu ayo i jaramasam ka bu wo i dɔ, na i susunma bu ka bu kɔ sukan Nyɛmɛ jɔrɛ, ¹⁵ na wɔ ma bu yiko ka bu kɔ sufɔn yi ajinim minɛm ɲu. ¹⁶ I jaramasa buru ni nnyɔm ni bo i yiiri bu n la Simon bo Yesu tuunri i duma ka Pɛtoro ni, ¹⁷ ni Yakobo ni i niɛma Yohane, bo bu si la Zɛbedi na Yesu

kaaki tuunri bu duma ka *Bowanaje*, i bu la ka bu tientien agaya ka nzue wɔ. ¹⁸ Bu nbem gusu la Andere, ni Filipu, ni Batolomeyo, ni Matio, ni Tomasi, ni Yakobo bo i si la Alafeyo ni, ni Tadayɔ, ni Simon bo i tu ηgoni fa kɔ i asien su ni, ¹⁹ ni Yudasi Isikariyoti bo i ba tɔɔri Yesu ni.

Kabo minem ηa Yesu ni Sitana dɛɛ ti kun ni

²⁰ Na Yesu akɔ awuru, na jama aba atien bu nɔɔ bekun bo i ni i susufɔm n akoro anya má tana bo bu di diire mmɔɔ. ²¹ Na sanɔa bo i minem tiiri i ηga ni, na ba kɔ ka bu kɔ fa i ba awuru, dama minem ηa i nyunu akan i. ²² Na Yudafɔm Nyemɛ nɔanie kerefɔm bo bu fiteeri Yerusalem miɛ kpiri n nu n ase ka, “Belazɛbuli bo i ti ajinim kere dɛɛ femɛ ni, wo i ηu a.” Na ba kaaki ase ka, “Yiri ajinim kere femɛ ni ma i yiko ye i koro fɔn yi ajinim n a.” ²³ Bu seeri sɔ ni, na Yesu afere bu, na wɔ bo bu miɛnu. I ηa, “Sitana koro yo se fɔn yi i dɛɛ ajinim minem ηu a? ²⁴ Ya fa i ka, nzen femɛya nya kpakpaakiiri nu wieeri, nyini femɛya ni kóro jina a? Ai, i kóro jina má. ²⁵ Na nzen awuru gusu bo i minem nya kpakpaakiiri nu, nyini awuru ni kóro jina a? Ai, i kóro jina má. ²⁶ Nzen Sitana dɛɛ femɛya n nya kpaakiiri nu wieeri, i kóro jina a? Ai, i kóro jina má. Nzen i nya yoori sɔ, i fanɔa wie wɔ. ²⁷ Be koro wura má sonɔ fanɔafo dika na i fin i nenɔge, má ka wɔ tara i fanɔa acin i nyama ka, ye i nya koro fin i nenɔge n bo i wo awuru n nu a.”

²⁸ Na Yesu akaaki ase ka, “M suse am nahɔre wɔ lɛɛ ka, Nyemɛ koro fa minem satie kere fa ce bu, haari fa kɔ sanɔa jɔre ηgbɛnɔgbɛn kere bo

bu jɔjɔri i fa kɔ Nyemɛ dɔ, ²⁹ ama, sɔnɔ kerɛ bo i jɔjɔ wuraari Awiewie Casi ni ngasi nu, Nyemɛ fá má i mi ngasi ce má i, dama i mi ayo satie bo i la má awieeri lɛɛ.” ³⁰ Deke bo i ti na Yesu seeri sɔ n la ka, berɛ Nyemɛ nɔanie kerefɔm ni, bu ɲa ajini wo i ɲu a.

Minɛm bo bu ti Yesu ni, ni i ninbaam nahɔrɛ su n jɔrɛ

³¹ Na Yesu ni, ni i niɛmam aba i dɔ awuru n bo i wo nu ni, na ba ka ajina dasin asunma ka bu fere i. ³² Na jama beberebe atana abara aye yiri Yesu na ba se i ka, “Ti fɛn. U ni, ni u niɛmam wo dasin koro u.” ³³ Na wɔ se bu ka, “Am ma m kere am bo bu ti m ni, ni m niɛmam.” ³⁴ Na wɔ nie abara aye minɛm bo bu tana bara yeeri i ni, na wɔ se bu ka, “Am nie. M ni, ni m niɛmam n yaa. ³⁵ Sɔnɔ kerɛ bo i yo Nyemɛ sa koroowa, yiri ti m siwa, ni m niwa, ni m ni a.”

4

Miɛɛnu fa kɔ kabo dɔdɔrifɔ be sandiiri alembaa ni

¹ Na Yesu akaaki akɔ Galili kunma kpiri n nɔɔ su, na wɔ bo i bu sukere minɛm Nyemɛ jɔrɛ, na jama beberebe atien bu nɔɔ i dɔ. Jama n sunnuuri beberebe n dɛɛ ti, na wɔ wura lee nu atana nzue n nu, na jama n kerɛ atien bu nɔɔ fa dodo nzue n nɔɔ su. ² Na wɔ bo miɛɛnu, na wɔ kere bu dekem beberebe. I ɲa, ³ “Am ti fɛn. Dɔdɔrifɔ be yo fiteeri sɔɔ, ka i kɔ sandi alembaa. ⁴ Saɲga bo i wo sandi su ni, na alembaam nbem atɔtɔ atin n nɔɔ, na anumam aba atambu bu ami. ⁵ Na nbem atɔtɔ tieka su,

deke bo fa sunnu má ni, na fa sunnu má n dɛɛ ti, na wɔ cɛ má, na wɔ fi, ⁶ ama, saɗga bo wiɛ ba fiteeri agaya ni, na wɔ waandi, dama bunlui n akpama abi má n dɛɛ ti. ⁷ Na aɛmbaa ni nbem atɔtɔ lɔlɔɛ nu, na lɔlɔɛ n anyi akata i ɲu, nyini ti, wɔ koro awura má mbaa. ⁸ Ama, na aɛmbaam ni nbem atɔtɔ asiɛn kpa su, na wɔ nyi awura mbaa zɔi zɔi.” ⁹ Na Yesu ase bu ka, “Bo i koro ka i ti ahin jɔrɛ n bu, i ti ye ni ka i so i sui na i ti.”

Deke bo i ti na Yesu boori bu miɛnu n ni

¹⁰ Na saɗga bo i kaari i ni i susufo buru ni nnyɔm ni, ni minɛm bo bu wo i dɔ saɗga kɛrɛ ni, na ba bisa i nyini miɛnu n bu. ¹¹ Na wɔ bɔ bu nu ka, “Amberɛ ye Nyɛmɛ ama am asi i femɛya n nu asiri jɔrɛ a, ama, minɛm bo bu su má m su ni, m bo i miɛnu kere bu a, ¹² adena i yó kabo ba kɛrɛ i Nyɛmɛ Jɔrɛ Kadasi n nu ni, ka, ‘Bu níɛ ni nahɔrɛ su, ama, bu ɲú má pui. Bu só bu sui ni nahɔrɛ su, ama, bu tí má deke n bo bu so bu sui ka bu ti i n bu, dama nzen má bu tiiri i bu, má bu káaki bu wo wɔ, na Nyɛmɛ fá bu satie ce bu.’ ”

Kabo Yesu kereeri miɛnu n bu ni

¹³ Na Yesu abisa bu ka, “Am ati má ahin miɛnu n bu? Ye am yó sɛ ti miɛnu nyingam n kɛrɛ bu a? ¹⁴ Ahin miɛnu n bu la ka, dɔdɔɔrifɔ n ti ka sɔnɔ n bo i kan Nyɛmɛ jɔrɛ n wɔ. ¹⁵ Mine nbem de Nyɛmɛ nɔaniɛ n kabo aɛmbaa n tɔtɔori atin n nɔɔ n wɔ. Bu nya tiiri Nyɛmɛ nɔaniɛ n na

bu de i, i ce má, na Sitana bá yi noanie n fite bu ahore su, a ñu ka bu wara afi i sa. ¹⁶ Mine nbem gusu de Nyeme noanie n kabo alembaa n totori tieka su n wo. Bu nya tiiri Nyeme noanie ni, a ñu ka ba de i ndende ni ahorejo, ¹⁷ ama, i da má bu ahore su. Bu kaaki ti ka alembaa n bo i bunlui akpama abi má n wo. I woori bu do kaan so na nzen wahara, wara kekereke be ba tuuri bu fa ko bu nyemesu n su, a ñu ka ba fa ati. ¹⁸ Nbem gusu de Nyeme noanie n kabo alembaa n totori loloe nu n wo. Bu nya tiiri Nyeme noanie ni, ¹⁹ ama, bu sunsunni kere wo kabo bu yo na bu asiri kata su, na bu koro kabo bu yo na bu nya ajeke kere, na bu ahore bi fa ko durunya n nu nengem su, na Nyeme noanie n koro da má bu ahore su na i yo juma. Bu ti ka alembaa n bo i wura má mbaa n wo. ²⁰ Ama, mine nbem de Nyeme noanie n kabo alembaa n totori asien kpa su n wo. Bu nya tiiri Nyeme noanie ni, na bu de i, na bu fa yo juma na i yo kperere beberebe.”

Kabo sono koro so ma sin su na i fa fie ni

²¹ Na Yesu abisa bu ka, “Am nya ñu ka sono be aso fitana su na i fa ganga butu su, nzen ma nyini i fa ko se gado bu? I fa taka deke su angoro wo bo sono kere koro ñu i, ma so? ²² Dama deke be wo ma bere bo i wo fiewa nu, na bu ba ñu ma i, na deke be gusu wo ma bere bo i wo asiri nu, na bu ba si ma i. ²³ Sono kere bo i koro ka i ti ahin jore n bu, i ti ye ni ka i so i sui na i ti.”

²⁴ Na wo se bu ka, “Am si am ñu sa ni kabo am ti noanie barasu ni. Gonggo bo am fa susu ma minem ni, so ye Nyeme gusu fa susu ma am a, na

bo Nyeme yó ma am ni tara sɔ n mmɔɔ. ²⁵ Dama sɔnɔ kere bo wɔ nya deke be Nyeme dɔ na i mi si i bita, Nyeme búka i su wɔ, ama, bo i si má i bita, haari ni nyini kaan n bo i la i ni, Nyeme dé i dɔ ɔ.”

Miɛnu fa kɔ kabo aɛmbaa fi barasu ni

²⁶ Na wɔ kaaki ase bu ka, “Nyeme femɛya n ti ka kabo dɔdɔrifɔ be kɔ sandi aɛmbaa i fiesu n wɔ. I dɛɛ la ka i sandi wɔ, ²⁷ na i kɔ da kɔngue, na i tenge alecin. Nyini sanga n ye aɛmbaa n fi a, na i sunyi, i si má kabo i yoori barasu. ²⁸ Asien n buka aɛmbaa n ye i fi a. I nya fi wieeri, na i nyi, na i nyinse, na i wɔrɔ, na i nya bi mbaa. ²⁹ Aɛmbaa n ba bi ni, i kpɛ sanga lee, na i kpɛ i.”

Aɛmbaa kaan be jɔre

³⁰ Na wɔ kaaki ase bu ka, “Ya fá nzu deke fa sunsun Nyeme femɛya n a? Wara ya fá miɛnu barasu bɔnɔ ye ya bó i fa kere kabo Nyeme femɛya n ti a? ³¹ I ti ka nyem mbaa bo bu dɔ i wɔ. Yiri ti aɛmbaa n kere kaan durunya n nu a. ³² Ama, bu nya ba dɔori i na i fiiri, i tara toro nyawam n kere bambaka, i koro nyi na i tetereki asambaa asambaa bo anumam koro yo bu tiɛrim nu.”

³³ Na Yesu afa nyini miɛnu n ni miɛnu nyingam beberebe akan Nyeme jɔre akere bu, kabo sɔnɔ kere koro ti i bu barasu. ³⁴ Jama n nya woori i dɔ, i se má bu pui, má ka miɛnu ye i bo bu a, ama, i ba kaari i ni i susufɔm ni, na i nya yi i bu kere kere bu.

Kabo Yesu kereeri ka i la yiko tara aṅuma ni nzue ni

³⁵ Nyini cēen n naaso saṅga, na Yesu ase i susufom n ka, “Am ma ya kpiε ko kunma kpiri n buekun do.” ³⁶ Na i susufom n acin ayaki jama ni, na ba ba awura lee n bo Yesu wo nu n nu, na ba ko. Na nbem gusu afa lee nbem na ba su i su. ³⁷ Na aṅuma bambaka be ayasu, na i subo nzue go lee n nu. Má lee ni suyi ni nzue wo. ³⁸ Nyini saṅga ni, Yesu afa piti ason i tii, ye i wo daafiri su lee n sin, na ba ba atenge i ase i ka, “Ya Kerefo, nzen ya suwu, u cece wo má ya nu fan?” ³⁹ Na wo yasu na wo tien aṅuma n ḡu, na wo se nzue n ka, “Da surum.” Na aṅuma n atara, na dika n kere atara jum. ⁴⁰ Na wo se bu ka, “Nzu ti ye am soro sere so a? Am yo má m yarada?” ⁴¹ Na sere akaaki ati bu agaya, na ba bisa bu ḡuḡu nu ka, “Nzu sonombiri barasu la ahin bo aṅuma ni nzue n mmoo de i noanie a?”

5

Kabo Yesu fon yiiri ajinim sono be ḡu ni

¹ Na Yesu ni i susufom n akpiε kunma kpiri n ako aju Gerasafom dee awore n nu. ²⁻³ Saṅga bo Yesu fiteeri lee n nu ni, na sono be afite faṅkunma nu aba akpa i atin. Nyini sono n nati da faṅkunma nu wo, dama ajini wo i ḡu. Sono be wo má bere bo i koro tara i cici i ni joroko n mmoo kun, ⁴ dama saṅga kere bu bo i tobari wo na bu wura i joroko buka su, ama, haari ni nyini n mmoo i titi joroko n wo na i kaaki bo sandi tobari n nu. Be wo má bere bo i la faṅga koro tara i jina kun. ⁵ Kongue ni wiesu kere i

wo fanƙunma nu sɔ ɔ, ni bukam su na i suciindi, na i sufa yabue kpiekpie i ɲu. ⁶⁻⁸ Na wo ɲu Yesu sanga bo i toko wo dede ni yiri ni, na Yesu atien ajini n ɲu ase i ka, “Ajini, fite yaki nyini sɔnɔ ni.” Na sɔnɔ n aɲmati akɔ akutu Yesu nyunu, na wo ciindi ase ka, “Yesu, Micera Nyeme Kpiri n Wa, a koro nzu m do fen a? M sere u wo, Nyeme ti, ma a ma m ɲu anyumboro.” ⁹ Na Yesu abisa i ka, “Bu fere u se?” Na wo bo i nu ka, “Bu fere m ka Jama Beberebefo, dama ya sunnu.” ¹⁰ Na wo sere Yesu jande ka ma i fon bu fite nyini awore n nu. ¹¹ Nyini sanga afam beberebe wo dodo bere, bu wo buka be su sudi, ¹² na ajinim n asere Yesu ka, “Ma ya ko fun afam n ɲu.” ¹³ Na Yesu ama bu atin na ba fite akɔ afun afam n ɲu. Afam n ju akpii nnyo dika, na bu kere aɲmati acɔondi akɔ ato kunma kpiri nzue n nu, na nzue n adi bu.

¹⁴ Afa sasafom ɲuuri nyini n sɔ ni, na ba ɲmati akɔ abo ndoori mie kunnu, ni aheme aheme kere su. Na mine aba anie sa n bo i yoori ni. ¹⁵ Na ba ba Yesu do, na ba ɲu sɔnɔ n bo ajinim n yo woori i ɲu n ka i tana Yesu bi wura tanlee, ni i nyunu koroya su, na sere ati bu. ¹⁶ Na minem bo bu ɲuuri sa n yoobiri ni, akan jore n kere akere jama n fa ko sa n bo i tuuri sɔnɔ n bo ajinim yo woori i ɲu ni, ni sa n bo i tuuri afam ni. ¹⁷ Bu tiiri jore n sɔ ni, na ba nya asere Yesu jande ka i yasu bu awore n nu. ¹⁸ Sanga n bo Yesu suwura lee n nu na i ko ni, na sɔnɔ n bo ajinim yo woori i ɲu ni, asere i jande ka i ma i su i su. ¹⁹ Ama, na Yesu akete, na wo se i ka, “Kpie u nyi ko awuru na a ko kan kere u lamokom fa ko sakpa n bo Mibie n

ayo ama u ni, ni kabo wɔ si u aɲunfo barasu ni.”
 20 Na sɔnɔ n akpie i nyi akɔ akan sakpa n kɛrɛ
 bo Yesu ayo ama i ni, abara ayɛ Miɛ Burum dɛɛ
 awɔrɛ n nu, na sɔnɔ kɛrɛ ayo alekutura.

Bara tukpakifo be, ni baabara be yiwee jɔrɛ

21 Na Yesu awura lee n nu akpie i nyi akpie
 kunma kpiri n buekun dɔ, na jama beberebe aba
 atien bu nɔɔ i bi nzue n nɔɔ su. 22 Na Yudafo
 kpien be wo bere, yiri niɛ bu tientienbunɔɔ sɔɔ
 n su a. Bu fere i ka Yarusi. Na wɔ ba Yesu dɔ
 nzue n nɔɔ su na wɔ kutu i jaa bu, 23 na wɔ sere
 i jande. I ŋa, “M wa sunguru ato cin. Bra na a ba
 fa u saa nana i ŋu na i nya ŋɔɔ ni laifie.” 24 Na
 Yesu asu i su na ba kɔ.

Na jama beberebe asu Yesu su haari bu kɔ
 sumie i ŋu. 25 Bara be woori jama n nu, i bita
 abieeri i afo buru ni nnyɔ lɛɛ bo i kpu na i kpie
 má. 26 Wɔ di wahara, na wɔ saaki i ŋwaa kɛrɛ
 atuntun i ŋu ayirifo dɔ dede haari wɔ ba afie,
 ama, wɔ nya má laifie se tukpaki n buka su kɔ ɔ.
 27 Na wɔ ti Yesu ŋga, na wɔ sakati awura jama
 n nu Yesu sin, afa i saa akan Yesu tanlɛɛ ni.
 28 Dama i seeri i kunnu ka, “Nzen m koro yoori
 anie faari m saa kaanri i tanlɛɛ n mmɔɔ, m nya
 laifie.” 29 Na wɔ yo sɔ n kpenɔa na i abieeri n
 akpie, na yiri ni i tii aɲu ka wɔ nya laifie. 30 Jina
 n nu bere na Yesu afa nu ka i yiko n be afite i
 ŋunie nu akɔ ayo juma. Na wɔ kaaki anie jama
 n nu, na wɔ bisa ka, “Ŋma faari i saa kaanri m
 tanlɛɛ n a?” 31 Na i susufom n ase i ka, “Wɔɔ
 mmɔɔ aɲu kabo jama n amie u barasu, ye nzu ti
 ye a bisa ka, ŋma fa i saa kaanri u a?” 32 Ama, na

wɔ niɛ abara aye na i si sɔnɔ n bo i yoori sɔ ni. ³³ Na sɛrɛ ati bara ni, i jina, i nɔniɛ kɛrɛ subobo i fa kɔ sa n bo i tuuri i ni, na wɔ ba akutu Yesu nyunu, na wɔ kan jɔrɛ n kɛrɛ ni i nahɔrɛ atin su akere i. ³⁴ Na Yesu ase i ka, “M wa, yarada n bo a yo m ni, yiri ma a nya laifiɛ a. Kɔ awuru ni ahoreda, na má u tɔrɛ n ba u ɲu kun.”

³⁵ Saŋga n bo Yesu toko wo jɔjɔ su ni, na mine nbem afite tientienbunɔɔ sɔɔ n kpien n dika aba ase i ka, “U wa n wo má bɛrɛ. Nyini ti, má a dama ya Kerefɔ n kun.” ³⁶ Na jɔrɛ n ato Yesu sui nu, ama, na wɔ se kpien n ka, “Má a ma sɛrɛ ti u, wɔrɔ yo m yarada.” ³⁷ Wɔ soro má su ka be su i su kun, má ka Petoro, ni Yakobo, ni i niɛma Yohane. ³⁸ Bu kɔ juuri kpien n dika ni, na Yesu awura aɲu ka mine beberebe suyo naɲmiɛ, bu susun subo awie. ³⁹ Na wɔ bisa bu ka, “Nzu ti ye am suyo naɲmiɛ sun sɔ a? Baabara n awu má, wɔ daafi wɔ.” ⁴⁰ Na ba siri i. Na wɔ fɔn bu kɛrɛ afite, na wɔ fa baabara n si ni i ni, ni i susufɔ nsanm ni, na ba kɔ sɔɔ n bo baabara n da nu ni. ⁴¹ Na wɔ kɔ atara i saa, na wɔ se i ka, “*Talita kumi.*” I bu la ka, “Sunguru kaan, m ɲa a yasu.” ⁴² Kpenɲa na sunguru n ayasu anati. I yo ti afɔ buru ni nnyɔ baa a. Na minɛm kɛrɛ bo bu woori bɛrɛ n ayo alekutura agaya. ⁴³ Na Yesu abɔbɔ bu ni nahɔrɛ su ka má bu ma be si sa n bo wɔ yo i ni, na wɔ se ka bu ma baa n deke be na i di.

6

Kabo Yesu ɲa Nyɛmɛ nɔaniɛ kanfɔ la má jirima i bɔsu ni

¹ Ye Yesu yasu kɔɔri i bɔsu na i susufɔm n asu i su. ² Na Yudaɔm Njumiyi cɛɛn n na wɔ kɔ bu tientienbunɔɔ sɔɔ n nu, na wɔ kɔ akan Nyemɛ jɔrɛ akere bu. Minɛm bo bu tiiri i kereewa n kɛrɛ yoori alekutura. Na ba bisa bu ŋuŋu nu ka, “Nifansu ye ahin sɔnɔ n kɔ sɔnsɔɔnri i si n kɛrɛ a? Bu maari i alecira bɔnɔ ɔ? Ye alekutura sam bo i yo bu ni, i yo sɛ yo bu a?” ³ Má Mariya wa n bo i ti kampiona n lɛɛ? Má Yakobo ni Yose ni Yuda ni Simon n gɔrɔ n lɛɛ? Am niɛ e. Má i niɛma nbaram mmɔɔ wo ya nu fen n a?” Na ba bu i ŋgbɛɛn. ⁴ Na Yesu ase bu ka, “Deke kɛrɛ bu ma Nyemɛ nɔɔniɛ kanfɔ jirima, má ka i bɔsufɔm ni i lamɔkɔm ni i gisannufɔm dɔ ŋgumi.” ⁵ Nyini ti, wɔ koro ayo má alekutura sa be i bɔsu dɔ se i faari i saa nanaari tukpakifɔ nbem ŋu wɔ, na ba nya laifiɛ. ⁶ Na wɔ yo i awarabo kabo i bɔsufɔm n ayo má i yarada ni.

Kabo Yesu sunmaari i susufɔ buru ni nnyɔm ni

Na Yesu abara aye aheme miem n kɛrɛ su, na i sukere minɛm. ⁷ Na wɔ fere i susufɔ buru ni nnyɔm ni, na wɔ sunma bu nnyɔ nnyɔ, na wɔ ma bu yiko ka bu kɔ sufɔn yi ajinim fite minɛm ŋu. ⁸⁻⁹ Na wɔ se bu ka, “Má am fa puitiripui kɔ ahin atin n bo am sukɔ ni, diire o, kuruku o, ŋwaa o. Ama, am fa kpama ni gbagbaa yiri. Má am se ka am fa tanlɛɛ buka bo am wura i n su.” ¹⁰ Na wɔ kaaki ase bu ka, “Am kɔ juuri miɛ be su, awuru kɛrɛ bo am kɔ wuraari nu, am ka nyini awuru n nu, haari am bá fite miɛ n nu. ¹¹ Sasu bekun miɛ bo am kɔ wuraari nu na ba de má am wɔfɔ, na ba kaaki asoro má am su ka bu ti am nɔɔniɛ ni, am fite yaki nyini miɛ n ni, na am kpɔnkpɔn yi

am jaa tuturi kerε. Nyini dí daani kere bu ka bu woowa ti má kpa.” ¹² Na i susufóm n afite akó akan Nyeme jore akere minem ka bu kaaki bu wo. ¹³ Na ba fon ayi ajinim minem beberebe nu, na ba sere Nyeme ama tukpakifóm dongu, na ba fa nguin ago bu nu, na ba nya laifie.

Kabo bu kuunri Yohane Nyeme Nzue Biefó n barasu ni

¹⁴ Na Feme Herode ati nyini sa n kerε, dama Yesu duma ata abara aye deke kerε. Na mine nbem ase ka, “Yohane Nyeme Nzue Biefó n ye wó tenge i yiwee n nu a, nyini ti ye i la yiko koro yo nyini alekutura sam kerε a.” ¹⁵ Ama, na nbem ase ka, “Yiri la Eliya a.” Na nbem gusu ase ka, “I ti Nyeme noanie kanfo ka dawa deem wó.” ¹⁶ Ama, Feme Herode tiiri nyini ni, na yiri ase ka, “Yohane bo m kpieri i tii n ye wó tenge a.”

¹⁷ Feme Herode yo ma bu taraari Yohane nyiiri wó, dama yiri Feme Herode afin i goro Filipu yi Herodiya afa aja. ¹⁸ Má pui ti, dama Yohane ase Feme Herode ka, “Nyeme noanie kpamaawa n kere ka a la má atin ka a fa u goro yi ja i ngoo su.” ¹⁹ Yohane seeri so ni, na Herodiya afa i ngasi na wó fo anminda i kabo i nya i na i kun i. Ama, wó koro anya má i, ²⁰ dama Feme Herode ni i tii soroori Yohane ka i ti sono fofoe bo i yo sa bo i kó atin su Nyeme do o. Wó koro má ka pui yo i. Na Feme Herode ajimi fa kó noanie n kerε bo Yohane kan maari i n su, ama, haari ni nyini mmoo, i koro ka i suti i noanie n wó.

²¹ Ceen be so o na Herodiya aba anya Yohane taraabiri. Nyini ceen n ye Feme Herode sugo

i baawu cɛɛn agɔrɛ n a. Na wɔ fere i gomina mine ŋgbɛngbirim, ni i soja nkpienkpienm, ni Galili mine tereterefɔm kɛrɛ ka bu ba di na bu nu. ²² Agɔrɛ n nu ni, na Herodiya wa sunɔguru awura agɔ akere Fɛmɛ Herode ni i jamam, na bu kɛrɛ ahore ajɔ. Dɔ ye fɛmɛ n seeri sunɔguru n ka, “Deke kɛrɛ bo a koro, se m, na m má u.” ²³ Na wɔ tan ndiɛ ase i ka, “Haari a ŋa m kpaaki m fɛmɛya n buekun ma u mmɔɔ, m fá ma u.” ²⁴ Na sunɔguru n afite akɔ abisa i ni ka, “Ye m sere nzu wɔ?” Na i ni n ase i ka, “Kɔ se i ka a koro Yohane Nyɛmɛ Nzue Biɛfɔ n tiiawa a.” ²⁵ Na wɔ ŋmati akpie i nyi ndende aba ase Fɛmɛ Herode n ka, “M koro ka na a fa Yohane Nyɛmɛ Nzue Biɛfɔ n tiiawa ma m pɛrɛntɛ nu kisa kisa.” ²⁶ Fɛmɛ n tiiri sɔ ni, na i ahore asaaki agaya, ama, ndiɛ n bo i taanri i jama n nyunu n dɛɛ ti, wɔ koro akaaki má i nɔɔ. ²⁷ Kpɛngɛ na fɛmɛ n asunma soja ŋmindafɔm n kun ka i kɔ fa Yohane tiiawa bra. Na wɔ kɔ akpie i tii dansaraka sɔɔ n nu dɔ. ²⁸ Na wɔ fa ada pɛrɛntɛ n nu aba ama sunɔguru ni, na yiri gusu afa akɔ ama i ni ni. ²⁹ Sangɛ bo Yohane susufɔm tiiri sɔ n na ba ba afa fuin n akɔ ase i.

Kabo Yesu maari nbiesɔm akpii nnu ni bu minɛm diire ni

³⁰ Na jaramasam n akpie bu nyi aba i dɔ, na ba kan sam kɛrɛ bo ba yo i n akere i, ni kabo ba kan Nyɛmɛ jɔrɛ akere mine barasu. ³¹ Jama n dɛɛ ti, ba nya má anyunɔkoro bo bu di diire. Nyini ti, na Yesu ase bu ka, “Am ma ya kɔ deke bo minɛm wo má, na am kɔ yi am ŋumi.” ³² Na bɛrɛ ŋgumi afa lee ni na ba kɔ. ³³ Bu yasu sukɔ ni, na minɛm

dɔŋgu aɲu bu, na ba si bu, na ba fite miɛ miɛm su aɲmati adu bu mɔ akɔ aju deke bo bu sukɔ ni. ³⁴ Sanga bo Yesu fiteeri lee n nu ni, na wɔ ɲu jama beberebe, na wɔ si bu aɲunfɔ, dama bu ti ka nbɔɛm bo bu la má sasafɔ ɔ, na wɔ kere bu dekem beberebe. ³⁵ Na sanga bo wiɛ ba suto ni, na i susufɔm n aba i dɔ aba ase i ka, “Kisa, wiɛ suto, ya wo boro gusu wɔ lɛɛ. ³⁶ Ma minɛm n atin na bu kɔ miɛ kunnu ni ahɛmɛ ahɛmɛ miɛm su na bu kɔ nya diire be to di.” ³⁷ Ama, na Yesu ase bu ka, “Amberɛ mmɔɔ ni am tii nya deke be ma bu na bu di.” Na ba se i ka, “Nzen a ɲa ya to kpɔnɔ ma ahin jama n kere, ya dí ɲwaa beberebe.” ³⁸ Na wɔ bisa bu ka, “Amberɛ la kpɔnɔ nye wɔ? Am niɛniɛ na am niɛ.” Na ba kɔ anie na ba bɔ i nu ka, “Kpɔnɔ nnu ni jombaa nnyɔ wo bere a.” ³⁹ Na Yesu ase i susufɔm n ka bu ma jama n tana asese asese wura fiefieɛwa n su. ⁴⁰ Na ba tana asese asese yaa yaa ni aburunu nnu. ⁴¹ Na wɔ fa kpɔnɔ nnu ni, ni jombaa nnyɔ ni, na wɔ ye i tii su angoro, na wɔ da Nyɛmɛ asi. Na wɔ kpiekpie kpɔnɔ nnu n nu, na wɔ fa ama i susufɔm n ka bu fa ma minɛm ni, na wɔ fa jombaa nnyɔ n gusu akpaaki bu kere nu. ⁴² Na bu kere adi na bu kunnu ayi. ⁴³ Na ba tambu kpɔnɔ, ni jombaa sinsin bo bu diiri na i kaanri ni, na ba nya kandie buru ni nnyɔ. ⁴⁴ Minɛm bo bu diiri kpɔnɔ n ni jombaa n kere yasuuri nbiesɔm akpii nnu wɔ.

Kabo Yesu natiiri nzue su ni

⁴⁵ Nyini sin na Yesu ama i susufɔm n awura lee n nu na bu du i mɔ kpie kɔ Besayida miɛ nu kunma kpiri n buekun, na yiri aka na i kaari

jama ni. ⁴⁶ I kaari bu wieeri ni, na wɔ fun akɔ buka n su ka i kɔ sere Nyemɛ. ⁴⁷ Saŋga bo ale ba saanri ni, lee n aju kunma kpiri n afien, na Yesu ŋgumi aka kunma kpiri n sin. ⁴⁸ Na wɔ ŋu ka i susufɔm n sudi wahara lee n kaanbiri, dama aŋuma sun bu kɔ bu sin wɔ. Na fa kɔ akɔnyuma ciciri su, na wɔ nati nzue n su suba bu dɔ, na wɔ yo ka i susin bu ŋu. ⁴⁹ Saŋga bo bu ŋuuri ka i nati nzue n su ni, na ba sunsun ka, ŋumi a, na ba bo awie. ⁵⁰ Bu kere ŋuuri i sɔ ni, na sere ati bu agaya. Kpenɔa na Yesu ajojo bu dɔ, na wɔ se bu ka, “Am ma am ahore si, mini a, má am soro sere.” ⁵¹ Na wɔ wura lee n nu, na aŋuma n atara. Na i susufɔm n kere ayo alekutura agaya. ⁵² Dama ba koro ati má i bu kabo i la yiko koro faari kponɔ nnu maari jama beberebem ni, bu ahorembaa ti kekereke n deɛ ti.

Kabo Yesu ma tukpakifɔm beberebe nyaari laifɛ ni

⁵³ Na ba kpiɛ nzue n aba aju awɔre n bo bu fere i ka Genesareti n nu, na ba minda lee n ahemɛ. ⁵⁴ Bu fiteeri lee n nu kpenɔa ni, na minem n asi ka Yesu lee. ⁵⁵ Na ba ŋmati abara aye miem n kere su, na deke kere bo bu tiiri i ŋga, bu sɔ bu tukpakifɔm ni bu dasum kere ba i dɔ ɔ. ⁵⁶ Na nzen i kɔori ahemɛ miem wara miɛ kunnu, deke kere bo i fa, bu fa bu tukpakifɔm ba i dɔ sɔ ɔ, na bu sere i jande ka i ma bu fa bu saa kan i tanlee n jaa bu. Na bo bu yoori sɔ n kere anya laifɛ.

7

Yudafɔm nana sayoowa jɔre

¹ Na Yudafoṃ Nyeme noaniε kerefṃ nbem bo bu fite Yerusalem miε kpiri n nu ni, ni Farasifoṃ n aba atien bu nɔɔ Yesu do. ² Na ba ηu ka Yesu susufṃ n nbem sudi diire bu saa fin, ba ηmisi má bu saa kabo bu nana sayoowa ti barasu ni. ³ Dama Farasifoṃ ni Yudafoṃ kere la bu saa ηmisi sayoowa bo i ti bu nana sa a. Bu nya ηa bu di diire, bu du mo yo nyini sa n wo ka, na bu nya di. ⁴ Nzen haari bu fiteeri go ba juuri awuru, bu di má nengem bo ba fa aba ni, má ka ba ηmisi i ka, na bu yo bu nana sayoowa bo bu yo na bu di ni. Bu sayoowam sunnu. Bu nbem la ka bu ηmisi awam ni dundum ni ayabam wo. ⁵ Na Farasifoṃ ni, ni Yudafoṃ Nyeme noaniε kerefṃ n abisa Yesu ka, “Nzu ti ye u susufṃ n su má ya nam sayoowa n su, ye bu di diire bu saa fin a?” ⁶ Na Yesu ase bu ka, “Nahore ye Nyeme noaniε kanfo Esaya yo kaanri am jore ka am ti burukoṃnufṃ n a. Wo kere i kadasi n nu ka, Nyeme ηa o,

‘Ahin minem ni, bu ma m jirima bu nɔɔ nu bere wo,
ama, i wo má bu ahore su.

⁷ Bu kansi m ηgbεen wo,
dama bu kere mine adamande deε kereewam wo,
na bu se ka nyini kereewa n fite Nyeme do o.’ ”

⁸ Na Yesu ase bu ka, “Am ace Nyeme noaniε maawa n ase buekun, na am nya susu adamande deε sayoowam su.”

⁹ Na wo se bu bekun ka, “Am la nahore bo am akpie mbenle ayaki Nyeme noaniε maawa n na am asu am deε sayoowam su ni. ¹⁰ Dama Moyisi

ase ka, ‘Bu u si ni u ni.’ Na wɔ kaaki ase ka, ‘Sɔnɔ kɛrɛ bo i jɔjɔri i si, ni i ni jɔrɛ tiɛ, wɔ yo daka ka bu kun i mi.’ ¹¹ Ama, ambɛrɛ kere ka nzen sɔnɔ be la deke be bo i ti ye ni ka i fa buka i si ni i ni, i koro se bu ka ‘I ti *Koroban* wɔ.’ I bu la ka, ‘Deke bo má m fa ma am ni, ma fa ayi saraka ama Nyɛmɛ.’ ¹² Nyini sangga ni, am akere ka i mi n koro buka má i si n ni i ni n lɛɛ. ¹³ Nyini n kere ka am abu Nyɛmɛ dɛɛ nɔaniɛ n ŋgbɛɛn lɛɛ, ye am su am dɛɛ sayoowam n bo am kere bu n su a. Na am la ahin sayoowam dɔŋgu bo am kaaki yo bu sɔ ɔ.”

Kabo Yesu ŋa diire diiwa koro yo má sɔnɔ fin ni

¹⁴ Na Yesu akaaki afere jama n aba i bi bekun, na wɔ se bu ka, “Am kɛrɛ so am sui na am ti jɔrɛ n bo m sujɔjɔ ma am n bu. ¹⁵ Deke bo i wura sɔnɔ nɔɔ nu koro yo má i mi fin, ama, deke bo i fite i mi ahore su yo i mi fin a. [¹⁶ Bo i koro ka i ti ahin jɔrɛ n bu, i ti ye ni ka i so i sui na i ti.]”

¹⁷ Sangga bo Yesu ba cinsi yakiiri jama n na i wuraari awuru n nu ni, na i susufɔm n abisa i nyini anyunderɛ n bu. ¹⁸ Na wɔ se bu ka, “Nka ambɛrɛ gusu ati má jɔrɛ n bu lɛɛ? Ambɛrɛ si má ka deke bo i wura sɔnɔ nɔɔ nu koro yo má i fin, ¹⁹ dama deke bo sɔnɔ di, i wura má i ahore su se i wura i kunnu wɔ, na i kaaki je yi i, má sɔ?” Yesu afa ahin jɔjɔwa n akere ka diire be la má ciire. ²⁰ Na wɔ kaaki ase bu ka, “Deke bo i fite sɔnɔ ahore su, nyini yo i fin a. ²¹ Dama deke bo i wo i ahore su ma i sunsunni tiɛ a. I koro ma i nati suyo sakaraya, na i suwɔ, na i sukun mine, ²² na i susaaki ajaa ciire, na i nyunu

suboro nenje kpini su, na i suyo satietiem, na i sudadaka minem, na i suyo sa ηgbεεnηgbεεn bo i cεcε wo má nu, na i susi kɔrε, na i nati susaaki minem duma, na i la karambani, na i nati suyo sinnzinya sam. ²³ Nyini satie n kere mmɔɔ nya fite sɔnɔ ahore su, nyini ma i mi kaaki findifo a.”

Kabo bara bo i ti má Yudafɔ yoori Yesu yarada ni

²⁴ Na Yesu ayasu akɔ awɔrε n bo i wo dodo Tiro ni Sidon mie kpirim ni, na wɔ kɔ awura awuru be nu benle ka má sɔnɔ be ηu i. Ama, wɔ koro afie má i ηu. ²⁵ Na bara be ati i ηga na wɔ ba ndende aba akutu i jaa bu. Ajini wo i wa baabara ηu. ²⁶ Bara n ti má Yudafɔ, i ti Fonisiyafɔ ɔ, bo i fite Siriya awɔrε n nu wɔ. Na wɔ sere Yesu jande ka i fon yi ajini n bo i wo i wa n ηu ni. ²⁷ Na Yesu ase i ka, “Ma nbaatumam n du mɔ di na bu kunnu yi ka, dama i ti má ye ni ka a fa nbaatumam diire na a fa ma caam.” ²⁸ Ama, na bara n ase i ka, “M Mibie, a la nahɔrε, ama, haari ni nyini mmɔɔ, caam n tambu nbaatumam n diire n bo bu di na i tɔtɔ asienngu n na bu fa di.” ²⁹ Na Yesu ase i ka, “U nɔanie jɔjɔwa n dεε ti, kɔ awuru. Ajini n afite ayaki u wa ni.” ³⁰ Na wɔ kɔ awuru akɔ aηu ka i wa n da i dasu su, ajini n afite ayaki i.

Kabo Yesu tuntuunri asuturi be barasu ni

³¹ Na Yesu ayasu Tiro awɔrε n nu akɔ aju Sidon mie kpiri n nu, na wɔ fa bere asin Mie Burum dεε awɔrε n nu, aba aju Galili kunma kpiri n nɔɔ su. ³² Na mine nbem afa sɔnɔ be aba Yesu dɔ, i ti asuturi wɔ, na i koro jɔjɔ má nyunyumi. Na ba sere Yesu jande ka i fa i saa nana i ηu na i nya

laifiε. ³³ Na Yesu afa sɔnɔ n afite jama n nu, i ni yiri ngumi, na wɔ fa i saa marakam awura i suim nu, na wɔ yi nanzue agɔ i saa su afa akan sɔnɔ n taferema, ³⁴ na Yesu aye i tii su anie angoro na wɔ ɲuundi, na wɔ se sɔnɔ n ka, “*Efata.*” Nyini la ka, “*Teke.*” ³⁵ Jina n nu bere, na sɔnɔ n sui n ateke, na i taferema n gusu akaaki anyanɲi nu, na wɔ koro ajojo nyunyumi. ³⁶ Na Yesu abobo bu ka má bu ma be ti ka wɔ tuntun sɔnɔ ni, ama, kabo i boboɔri bu barasu ni, bu boori ndoori n gusu sɔ ɔ bara yeeri a. ³⁷ Na mine ayo alekutura haari ako asin su, bu ɲa, “*I sayoowa kere kaba ti kpa a. I ma asuturim ti asui wɔ, na bobom jojo.*”

8

Kabo Yesu maari minem akpii nna diire ni

¹ Nyini sanɲa n na jama beberebe aba atien bu nɔɔ Yesu do bekun, bu la má deke bo bu di, na wɔ fere i susufɔm ni, na wɔ se bu ka, ² “*Ahin jama n la m anunfo, dama i nyuma lesan lee bo bu wo m do na bu la má deke bo bu di.*” ³ M koro yaki má bu na bu ko awuru ni ahɔε, má nyini, bu to cin atin nu wɔ, dama bu nbem fite dede.” ⁴ Na i susufɔm n ase i ka, “*Ye nifansu ye ya koro nya diire ahin boro n nu fen ma ahin minem n kere na bu kunnu yi a?*” ⁵ Na wɔ bisa bu ka, “*Am la kpɔnɔ nye wɔ?*” Na ba bo i nu ka, “*Nso.*” ⁶ Na wɔ ma jamam n nɔɔ ka bu tana asiɲgu, na wɔ fa kpɔnɔ nso n na wɔ da Nyeme asi. Na wɔ kpiekpie i nu ama i susufɔm n ka bu fa ma jama ni. Na bere gusu afa akpakpaaki bu nu. ⁷ Bu la jombaa kan kan nbem gusu, na wɔ fa ada Nyeme asi, na wɔ fa ama i susufɔm n ka bu fa nyini n gusu ma

jama ni. ⁸ Bu diiri na bu kunnu ayi. Na i susufom n atambu sinsin kaawa n kandie nso. ⁹ Jama ni ju akpii nna dika. Na Yesu anya akaari bu na ba ko awuru. ¹⁰ Na i ni i susufom n awura lee ako Damanuta dee awore n nu.

Kabo Farasifom koroori ka Yesu yo alekutura sa na i keteeri ni

¹¹ Na Farasifo nbem aba i do, na ba se akuruwa ni Yesu. Bu koroori ka i yo alekutura sa be bo i kere ka i yiko n fite Nyeme do o, adena bu nya i ngee soobiri. ¹² Na wo nuundi ni dimi i ahore su, na wo se ka, "Nzu ti ye ambere nyumafom koro ka m yo alekutura sa na am nu i a? M suse am nahore wo lee ka, m yo ma alekutura sa ma ma ambere nyumafom fuu." ¹³ Na wo yasu ayaki bu, na wo wura lee n nu akpie ako kunma n buekun do.

Bobowa fa ko Farasifom ni Feme Herode kereewam n su

¹⁴ Na i susufom n wara afi diire sa, ba bita ma pui, ma ka kpono kun n kpein woori lee n nu a. ¹⁵ Na Yesu atu bu fo, i na, "Am si am nu sa ni Farasifom, ni Feme Herode dee kpono ayiri n bo bu fa go kpono n nu na i yasu ni." ¹⁶ Na ba joko bu nu nu ka, "Ya la ma kpono n ti, ye i su se so n a." ¹⁷ Na Yesu afa nu kabo i susufom n sujoko bu nu nu ni, na wo bisa bu ka, "Nzu ti ye am sujoko ka am bita ma kpono a? Am nya si ma deke bo m sujoko i ni, am nya ti ma sa n bu? Am ahorembaa ti kekereke wanla. ¹⁸ I baari se ye am la anyumbaa na am nu ma asi a? Ye am la asui na am ti ma? Am tenge ma su ka ¹⁹ m yo faari

kpɔnɔ nnu kpiɛkpiɛ maari minɛ akpii nnu? Ye bo i kaari ni, kandie nye ye am sasaari a?" Na ba bo i nu ka, "Kandie buru ni nnyɔ." ²⁰ Na Yesu akaaki abisa bu bekun ka, "Ye kpɔnɔ nso n bo m yo fa kpiɛkpiɛ maari minɛ akpii nna n di? Sinsin kandie nye ye am sasaari a?" Na ba bo i nu ka, "Kandie nso." ²¹ Na wɔ se bu ka, "Haari ni kisa, am nya ti má i bu?"

Kabo Yesu tuntuunri anyinsin be na i ɲuuri asi ni

²² Bu kɔ juuri Besayida miɛ n nu, na minɛ nbem afa anyinsin be aba Yesu dɔ, na ba sere i jande ka i fa i saa nana i ɲu na i nya laifiɛ. ²³ Na wɔ so sɔnɔ n saa nu afa i afite miɛ n nu, na wɔ yi nanzue agɔ i nyumbaa n nu. Na wɔ fa i saa anana i ɲu, na wɔ bisa i ka, "A niɛ, a ɲu deke be e?" ²⁴ Na anyinsin n aye i tii su anie, na wɔ se Yesu ka, "M ɲu minɛm ka bu nati, ama, bu ti ka bakam wɔ." ²⁵ Na Yesu akaaki afa i saa anana i nyumbaa n su bekun, na anyinsin n anie gbirim, na wɔ ɲu ka i nyumbaam n ateke, na wɔ ɲu deke kere casi. ²⁶ Na Yesu ase i ka, "To atin nu kɔ awuru, na má a se ka a fa miɛ n nu."

Kabo Petoro kereeri ka Yesu ti barasu ni

²⁷ Na Yesu ni i susufɔm n ayasu ka bu kɔ Sizariya Filipu miɛ kan kanm su. Bu wo natiiri su ni, na wɔ bisa i susufɔm n ka, "Minɛm fa m bu ɲma a?" ²⁸ Na ba bo i nu ka, "Bu ɲa wɔrɔ ti Yohane Nyeme Nzue Biefɔ n a, nbem ɲa wɔrɔ ti Nyeme noanie kanfɔ Eliya a, ye nbem gusu ɲa a ti dawa dɛɛ Nyeme noanie kanfɔ nyingam n kun wɔ." ²⁹ Na wɔ bisa bu bekun ka, "Ye amberɛ

fa m bu nma a?" Na Petoro abo i nu ka, "Woro ti Kristo n a, Tiidefo n bo Nyeme ase ka i sunma i ni." ³⁰ Na Yesu abobo bu ka ma bu ma be si ka yiri ti Kristo Tiidefo n a.

Kabo Yesu jɔɔ fa kɔɔri i yiwee n su ni

³¹ Nyini sin na wo bo i bu sukere i susufom n ka, "Wo yo daka ka mini Adamande Wa n di wahara dongu, na Yudafom nkpienkpienm, ni Nyeme sayoowa donguyofom nkpienkpienm, ni Nyeme noanie kerefom kere ba kete m nju na bu kun m. Ama, lesan cen sin na m tenge m yiwee n nu." ³² Na wo kan sa n kere bu kpain akere bu. Na Petoro afa i ako aheme, na wo jarki i ase i ka, "Ma a se ka a kan nyini jore ni." ³³ Ama, na Yesu ace anie i susufom ni, na wo tien Petoro nju ase i ka, "Sitana, fa cinsi m bi bere. A sunsun ma kabo Nyeme koro ni. A sunsun kabo adamande koro n wo."

Kabo Yesu jɔɔ fa kɔɔri kabo minem su i su ni

³⁴ Na Yesu afere jama n ni i susufom n na wo se bu ka, "Sono kere bo i koro ka i su m su, wo yo daka ka i mi wara fi i tiengu sa koroowa sa, na i fa i yiwee baka jaanu n so, na i su m su. ³⁵ Dama sono kere bo i koro ka i fa i ngoo fie, i mi ba fun i. Ama, sono kere bo i toori i ngoo mini ni m dee labari kpa n dee ti, i mi nya ngoo. ³⁶ Nzen sono nyaari durunya n nu deke n kere na i fuunri i ngoo, i kperere la bono? ³⁷ Nzu deke ye sono koro fa kaaki i ngoo a? ³⁸ Nyumafom ti satieyofom wo, bo bu su ma Nyeme. Ambere bo am wo bu nu, na nyinse ti am fa ko mini ni m noanie n dee ti ni, so ye nyinse ti mini Adamande

Wa n gusu fa kɔ am su, sanɔa bo m bá ba ni m Si Nyeme jirima woowa n nu, ni i merেকে casim ni.”

9

¹ Na wɔ se bu ka, “Nahore ye m suse am n a, am nbem wo nu fen bo am wú má, má ka am aba anu ka Nyeme femeya n aba ni yiko.”

Kabo Yesu ηunie kaakiiri wo barasu ni

² Lesen cɛɛn sin na Yesu afa Petoro ni Yakobo ni Yohane afun buka lenlenge be su, bu ni yiri ηgumi. Bu wo dɔ n na ba ηu ka i ηunie akaaki wo, ³ na i tanlee n akaaki fofoe papasi bo i ηusu nya má durunya n nu. ⁴ Dɔ na mine nnyɔ nbem atie bu ηu, na bu ni Yesu subo anzama. Bere la Eliya ni Moyisi, dawa dee Nyeme noanie kanfɔm ni. ⁵⁻⁶ Na sere ati Petoro ni susufɔ nyingam ni, na Petoro ajimi agaya na i nɔɔ afinfin i. Nyini ti na wɔ se Yesu ka, “Ya Kerefɔ, i ti kpa ka ya wo fen. Ma ya bo nambue nsan, u dee kun, Moyisi dee kun, na Eliya gusu dee kun.” ⁷ Na yinyinggu akata bu ηu, na ba ti akonvi be ηga yinyinggu n nu, na wɔ jɔjɔ bu dɔ. I ηa, “M wa koroowa lee. Am de i noanie.” ⁸ Bu tiiri jɔjɔowa n sɔ ni, kpenɔa na ba nienie abara aye, ama, ba ηu má sɔnɔ be kun, má ka Yesu ηgumi wo bu dɔ a.

⁹ Na sanɔa bo bu ba sujura buka n su ni, na Yesu abɔbɔ bu ka, “Má am be se ka i bo sa n bo am anu i n su fa kere sɔnɔ be, haari fa kɔ sanɔa bo mini Adamande Wa ni bá wu na m tɛnge m yiwee n nu ka.” ¹⁰ Na ba de i noanie ni, ama, na ba bakati abisa bu ηunηu nu ka, “Ye nzu la ka, i bá wu na i tɛnge i yiwee n nu a?” ¹¹ Na ba bisa

Yesu ka, “Ye nzu ti ye Nyeme noanie kerefom n bita jojo ka Eliya du mo ba ka, ye Kristo Tiidefo ni ba ba na?” ¹² Na wo bo bu nu ka, “I ti nahore wo ka Eliya du mo ba na i ba sese deke n kere su. Bu kereeri se Nyeme Jore Kadasi n nu fa ko Adamande Wa n do a? Ba kere ka i ba di wahara agaya, na mine bu i ngbeen. ¹³ Ama, m suse am wo lee, ka, Eliya adu mo aba, na minem ayo i kabo bu koro, kabo ba kere i Nyeme Jore Kadasi n nu lee.”

Kabo Yesu fon yiiri ajini fiteeri baa be nu ni

¹⁴ Sanga bo Yesu ni i susufo nsanm ni kpieeri bu nyi ba juuri i susufo nyingam bi ni, na ba nu ka jama beberebe atien bu noo abara aye bu. Ye Nyeme noanie kerefom n nbem bita bu ni akuruwa. ¹⁵ Jama n nuuri Yesu so ni, na ba yo alekutura, na ba bo nu anmati akpa i atin ayo i anse. ¹⁶ Na wo bisa bu ka, “Am se nzu akuruwa a?” ¹⁷ Sono be woori jama n nu na wo bo i nu ka, “Ya Kerefo, ma fa m wa baabieso aba u do ka a tuntun i ma m, dama ajini bobom wo i nu. ¹⁸ Sanga kere bo ajini n anya aba afa i, a nu ka wo fa i abo asienngu, na i nanzue sufite fufuku, na i sukpepe i jee, na i kese i nu. Ma sere u susufom n ka bu fon yi ajini ni, ama, ba kura ma nu.” ¹⁹ Na Yesu ase bu ka, “Amaa. Ambere nyumafom, am la ma yarada fieo. Nyuma sa ye m wo am do fen a? Ye m yo sawore ni ambere ko ju se wo? Am fa baa n ba ma m.” ²⁰ Na ba fa baa ni aba i do, na sanga bo ajini n nuuri Yesu ni, kpennga na wo kpisi baa ni, na wo fa i abo asienngu, na wo da sukundu, na nanzue fufuku

sufite i nɔɔ nu. ²¹ Na Yesu abisa i si n ka, “Sanɔa bɔnɔ ye tukpaki n taraari i a?” Na si n abɔ i nu ka, “I kaan nu kere a. ²² Sanɔa kere bo i nya ba yasu i ɲu, i fa i wura sin nu wɔ, wara nzue nu ka i kun i. Nyini ti, nzen a koro buka ya, si ya aɲunfo na a buka ya.” ²³ Na Yesu ase i ka, “Nzu ti ye a ɲa nzen m koro buka u a? Deke be ti má kekereke ma má minem bo bu yo Nyeme yarada ni.” ²⁴ Kpenɔa na baa n si asa Yesu nɔɔ su ka, “Ma yo yarada, ama, i sunnu má. Buka m na i sunnu.” ²⁵ Na Yesu aɲu ka jama n suɲmati ba i do, na wɔ tien ajini n ɲu, i ɲa, “Wɔɔ ajini n bo a ma baa n ayo bobo ni asuturi ni, mini suse u ka a fite yaki i a, na má a kpie u nyi ba i do kun.” ²⁶ Kpenɔa na wɔ ciindi na wɔ kpisi baa n agaya, na wɔ fite ayaki i, na baa n aka ada ka wɔ wu deɛ su. Na minem n doɲgu ase ka wɔ wu wɔ. ²⁷ Ama, na Yesu atara i saa aye i su, na wɔ jina.

²⁸ Yesu ba wuraari awuru n nu ni, na i susufɔm n aba i do, bere ɲgumi, abisa i ka, “Nzu ti ye yere akoro afɔn má nyini ajini n a?” ²⁹ Na wɔ bo bu nu ka, “Be koro fɔn má nyini ajini n ɲusu so, má ka nyemesere.”

Kabo Yesu jɔɔ fa kɔɔri i yiwee n su bekun ni

³⁰ Na Yesu ni i susufɔm n ayasu bere ako asin Galili awɔre n nu. Wɔ koro má ka be si i woobiri, ³¹ dama i sukere i susufɔm wɔ. Na wɔ se bu ka, “Bu bá to mini Adamande Wa n ma mine nbem na bu kún m, ama, bu kuunri m wieeri, i lesan ceɛn sin, na m tɛnge m yiwee n nu.” ³² I jɔɔɔri so ni, i susufɔm n ati má i bu, ama, sere deɛ ti, ba koro abisa má i jɔre be.

Kabo Yesu kereeri sɔnɔ bo i tara bu kere ni

³³ Na ba kɔ aju Kapenam miɛ kpiri n nu, na sanga bo bu wo awuru n nu ni, na Yesu abisa i susufɔm n ka, “Am wo atin n nu suba ni, am se nzu akuruwa a?” ³⁴ Ama, na bu kere atɔ amuna, dama bu wo atin n nu dɔ ni, na ba se akuruwa bu nɔnɔ nu fa kɔ sɔnɔ bo i tara bu kere bu nu. ³⁵ Na wɔ tana, na wɔ fere bere i susufɔ buru ni nnyɔm ni, na wɔ se bu ka, “Sɔnɔ kere bo i koro ka i kaaki mɔfɔ, wɔ yo daka ka i mi yo i nɔ kaan tara am kere na i kaaki yo am kere deɛ amususufɔ.” ³⁶ Na wɔ fa baa kaan be aba ajina bu aɛn, na wɔ biti i, na wɔ se bu ka, ³⁷ “Wɔrɔ kere bo ade ahin baakan n nɔsu m deɛ ti, a deeri mini wɔ lɛɛ. Bekun, wɔrɔ kere gusu bo a nya deeri mini, a de m Si Nyeme bo i sunmaari m wɔ lɛɛ.”

Kabo Yesu ŋa bo i fite má i sin, jina i sin ni

³⁸ Na Yohane ase i ka, “Ya Kerefɔ, ya nɔuri ka sɔnɔ be afa u duma sufa fɔn yi ajinim fite minem nɔ, ye ya ŋa ya yaki má i, dama i wo má ya nu n deɛ ti.” ³⁹ Na Yesu ase ka, “Má am se ka am kanda i, dama sɔnɔ kere bo i nya sufa m duma n yo alekutura sam, i mi bá koro kaaki jojo má jɔre tie fa kɔ m dɔ. ⁴⁰ Dama sɔnɔ kere bo i fite má ya sin, i mi jina ya sin wɔ lɛɛ. ⁴¹ M suse am nahɔre wɔ lɛɛ, ka sɔnɔ kere bo i maari am nzue ka am nu dama am su mini deɛ ti, i mi nyá i ŋkatɔ.”

Kabo wɔ yo daka ka má sɔnɔ wura satie nu ni

⁴² Na Yesu akaaki ase bu ka, “Wɔrɔ kere bo u sayoowa ma ahin nbaatuma kan kanm n be bo i yo m yarada n be wuraari satie nu, i ti má kpa. Nzen má bu faari ŋgani san yabue bambaka

ciciiri u kóm, na bu fa u kó tu tieku nu, i ti ye tara bo a ma ahin nbaatuma kan kanm n be wura satie nu ni. ⁴³⁻⁴⁴ Nzen u saa n be cin u wura satie nu a, kaba kpie i na a ka asaasin, na a nyá u ñu kó Nyeme dó. I ti ye ni bo a la u saa nnyo n kere na a wura ceema sin n bo i no má n nu. ⁴⁵⁻⁴⁶ Nzen u jaa n be cin u wura satie nu a, kaba kpie i na a ka ajaasin, na a nyá u ñu kó Nyeme dó. I ti ye ni bo a la u jaa nnyo n kere na bu ba fa u tu ceema sin nu. ⁴⁷ Nzen u nyumbaa kun gusu cin u wura satie nu a, lokoti yi i tu, na a ka anyunu kun, na a wúra Nyeme femeya n nu. I ti ye ni bo a la u nyumbaa n nnyo n kere na bu ba fa u tu ceema sin nu. ⁴⁸ Dó dæ kakabam ni bo bu wura mine bo ba wu ni, bere wu má ceen be, na sin n gusu bo i je no má.

⁴⁹ Kabo bu fa njin nyina saraka nenge kere su fa ma Nyeme, na i yo casi barasu ni, so ye Nyeme cin sono kere sui na i yó casi. ⁵⁰ Ya si ka njin yo fie, ama, nzen i fiefie nya ba saari wieeri, i koro yo má fiefie kun. Am ma am wo yo fie ka njin am benju nu, na am wo ni tanalaifie.”

10

Kabo Yesu kereeri minem fa kó ajaa ni ajaa yaki atin su ni

¹ Yesu yasuuri Kapenam mie kpiri n nu, na wo kó Yudiya dæ awore n nu, na wo kpie ako Yodan kunma n buekun dó fan, na jama beberebe ayandi aba atien bu noo i dó. Na wo kere bu kabo sanja kere na i kere bu barasu ni.

² Na Farasifo nbem aba i dó ka bu so i ñge fa kó i noanie n jójówa su, na ba bisa i ka, “Ya dæ

atin n su, atin wo nu ka sɔnɔ koro fa i yi ji i?"
³ Na Yesu abɔ bu nu ka, "Nɔaniɛ maawa bɔnɔ ye Moyisi yo fa maari am a?"
⁴ Na ba bɔ i nu ka, "Moyisi yo maari atin ka nzen sɔnɔ koro ka i fa i yi ji, i ti ye ni ka i mi ma bara n ajaa yaki kadasi ka, na i nya fa i ji."
⁵ Na Yesu ase bu ka, "Am ahorembaa kekereke n dɛɛ ti ye Moyisi yo kɛrɛri nyini nɔaniɛ maawa n maari am a."
⁶ Ba kɛrɛ i Nyemɛ Jɔrɛ Kadasi n nu ka fite durunya n bumboori, 'Nyemɛ yiiri biesɔ ni bara a.'
⁷ Na wɔ se ka, 'Nyini dɛɛ ti, i ti ye ni ka biesɔ n kpaaki i gisan yaki i si ni i ni, na i ni i yi sanɔga wo.'
⁸ Nyini sanɔga bu minɛ nnyɔ n ayo deke kun lɛɛ.' Bu wo má bu ngungumi kun.
⁹ Nyini ti, deke bo Nyemɛ anya asanɔga i awie, má sɔnɔ kpaaki i nu kun."

¹⁰ Sanɔga bo Yesu ni i susufɔm ba juuri awuru ni, na ba bisa i nyini nɔaniɛ n bu.
¹¹ Na wɔ se bu ka, "Sɔnɔ kɛrɛ bo i faari i yi jiiri, na i jaari bara fɔfɔrɛ, i mi n asaaki ajaa ciire ni i yi n bo wɔ fa i aji n lɛɛ."
¹² Sasu bekun, bara kɛrɛ bo i yakiiri i hun ajaa, na i kɔ jaari biesɔ fɔfɔrɛ, nyini bara n gusu asaaki ajaa ciire lɛɛ."

Kabo Yesu yoori nbaatumam kisi ni

¹³ Minɛm sufa bu nbaam ba Yesu dɔ ka i fa i saa nana bu ŋu na i yo bu kisi, ama, na i susufɔm n atien bu ŋu.
¹⁴ Yesu ŋuuri i susufɔm sayoowa n sɔ ni, na yaa ati i, na wɔ se bu ka, "Am ma nbaatumam n bra m dɔ, má am fɔn bu. Dama bɛrɛ ŋusu sɔ ye Nyemɛ femɛya n ti bu dɛɛ a."
¹⁵ Nahɔrɛ ye m suse am n a, wɔrɔ kɛrɛ bo a de má Nyemɛ femɛya n nu jɔrɛ kabo baatuma de deke i saa nnyɔ ni, a wúra má Nyemɛ femɛya n

nu.” ¹⁶ Na wɔ kuku nbaatumam ni i saa nu, na wɔ fa i saa anana bu ɲu, na wɔ yo bu kisi.

Nenɛgefɔ n ni nyɛmɛsu jɔrɛ

¹⁷ Nyini sin na Yesu ayasu dɔ sukɔ. I wo kɔ n su ni, na sɔnɔ be aɲmati aba akutu i nyunu, na wɔ bisa i ka, “Ya Kerefɔ sɔnɔ kpa, m yɔ sɛ ye m bá nya ɲɔɔ n bo i la má awieeri n a?” ¹⁸ Na Yesu abɔ i nu ka, “Nzu ti ye a fere m ka sɔnɔ kpa a? Be ti má kpa sin Nyɛmɛ ɲu. ¹⁹ Ye m ɲa a si Nyɛmɛ nɔaniɛ maawam ni e, bu ɲa, ‘Má a kun sɔnɔ. Má a saaki ajaa ciire. Má a wɔ. Má a di kɔrɛ daani. Má a sisi sɔnɔ. Bu u si ni u ni.’ ” ²⁰ Na sɔnɔ n abɔ i nu ka, “Ya Kerefɔ, ma su nyini nɔaniɛ maawa n kerɛ su haari m kaan nu.” ²¹ Na Yesu aniɛ sɔnɔ n na wɔ koro i agaya, na wɔ se i ka, “Deke kun ye wɔ kpɛ u su a. Kɔ na a kɔ tɔ u aja kerɛ, na a fa ɲwaa n ma yaarifɔm, na a bá nya ajekɛ Nyɛmɛ dɔ, na a bra ba su m su.” ²² Yesu seeri i sɔ n na i ɲunie ayɔrɔki i. Na wɔ kɔ awuru ni ahoresaaki, dama i la nenɛge agaya n dɛɛ ti.

²³ Na Yesu aniɛ i susufɔm n abara aye, na wɔ se bu ka, “I yɔ kekereke bo nenɛgefɔ wura Nyɛmɛ fɛmɛya n nu.” ²⁴ Na i susufɔm n ayo alekutura ni nyini jɔjɔwa ni. Ama, na Yesu ase bu bekun ka, “Njam, i ti kekereke ka nenɛgefɔm wura Nyɛmɛ fɛmɛya n nu. ²⁵ Kabo nyɔɔma sin misini bue nu ni, i ti má kekereke tara má kabo nenɛgefɔ yo na i wura Nyɛmɛ fɛmɛya n nu ni.” ²⁶ Na i susufɔm n amɛ akɔ asin su, na ba bisa bu ɲɲu nu ka, “Ye nzen i ti sɔ e, ɲma koro fite nu a?” ²⁷ Na Yesu aniɛ bu dɔ na wɔ se ka, “I ti deke bo adamande

koro yo má i, ama, Nyeme do, i ti má pui, dama Nyeme koro yo deke kere.”

²⁸ Na Petoro ase i ka, “To, ye yere ayaki deke kere susu u su e.” ²⁹ Na Yesu ase ka, “Nahore ye m suse am n a, sono kere bo i yakiiri i awuru, wara i ninbaam, wara i ni, wara i si, wara i nbaam, wara i asien, mini ni m labari kpa n dee ti, ³⁰ i mi nya nyinim so nusu yaa i ngoo su. I nya awurum, ni ninbaam, ni nim, ni nbaam, ni asienm, na minem ma i di wahara, na fa ko fa ba i nya ngoo bo i la ma awieeri. ³¹ Ama, mine dongu bo bu wo mo kisa ni ba ka sin, na bo bu ka sin kisa n ba du mo.”

Kabo Yesu jajo fa koori i yiwee n su kpe nsan su ni

³² Sangha bo Yesu ni i susufom suko Yerusalem mie kpiri n nu ni, na Yesu adu bu mo sunati, na i susufom n ajimi, na sere ati minem bo bu suuri i su ni, na wo kaaki afere i susufo buru ni nnyom n ako aheme, na wo jajo bu do bekun fa ko sa n bo i ba tu i ni. ³³ I na, “Am ti fen. Ya suko Yerusalem lee, do ye bu ko tara mini Adamande Wa n a, na bu fa m ma Nyeme sayoowa dongu-yofo nkpienkpienm ni, ni Nyeme noanie kerefom ni, na bu di m jore, na bu soro su ka bu kun m. Na bere gusu nya fa m wura minem bo bu ti ma Yudafom saa nu, ³⁴ na bu yo m anzasi, na bu yi nanzue go m nu, na bu fin m ngbere, na bu nya kun m, na i lesan cen sin, na m tenge m yiwee n nu.”

Kabo Yesu kereeri ka mofa yo i nu kaan ni

³⁵ Na Zebēdi nbaam Yakobo ni Yohane aba Yesu dɔ aba ase i ka, “Ya Kerefo, ya koro ka deke kere bo ya sere u, a yo i ma ya.” ³⁶ Na wɔ bisa bu ka, “Am koro ka m yo nzu ma am a?” ³⁷ Na ba se i ka, “Sanga bo a bá tana u jirima tanaabiri ni, ya koro ka a ma ya kun tana u saa fomboro su, na kun gusu tana u saa bie su.” ³⁸ Na Yesu ase bu ka, “Am si má deke n bo am susere i n ti a. Am kóro di wahara n bo m dí i ni, am káaki koro wu yiwee n bo m wú i ni, nzen se?” ³⁹ Na ba bo i nu ka, “Een, ya kóro yo i kere.” Na Yesu ase bu ka, “Nahore. Am dí wahara n bo m dí i ni, na am káaki wu yiwee n bo m wú i ni. ⁴⁰ Ama, mini la má atin bo m má am be tana m fomboro su, na be tana m bie su. Ama, Nyeme asese nyini tanaabiri n su, afa ase ama minem bo yiri ni i tii ayi bu n a.”

⁴¹ Sanga bo i susufo burum ni tiiri kabo Yakobo ni Yohane n seeri Yesu ni, na ba fa yaa bu nu. ⁴² Na Yesu afere bu kere aba i bi, na wɔ se bu ka, “Am si tenle su ka minem bo bu su má Nyeme n na bu yo bu nu nkpienkpienm ni, bere mie bu minem a, na bu tereterefom gusu kere kabo bu yiko ti barasu. ⁴³ Ama, wɔ ti má ye ni ka ambere yo so. Nzen sonɔ be koro ka i wura i nu kpiri am kere nu, i ti ye ni ka i mi yo i nu kaan, na i su am. ⁴⁴ Na bo i kaaki koro ka i yo am mɔfo, i ti ye ni ka i mi yo am kere akɔɔ. ⁴⁵ Dama mini Adamande Wa n ni m tii aba má ka minem su m wɔ, ama, m baari ka m ba su minem wɔ, na m wu ma bu, na m de minem dongu tii ji.”

Kabo Yesu tuntuunri anyinsin be na i nuuri asi ni

⁴⁶ Na ba kɔ aju miɛ kpiri n bo bu fere i ka Yeriko ni. Sangba bo Yesu ni i susufɔm, ni jama beberebe n sufite miɛ n nu ni, anyinsin be tana atin n nɔɔ wo sere su. Bu fere i ka Batimeyo, Timeyo dɛɛ wa. ⁴⁷ I tiiri ka Yesu Nazaretifo ni susin ni, na wɔ tien afere i, i ɲa, “Yesu, Fɛmɛ Davidi anuma, si m aɲunfɔ.” ⁴⁸ Na jama n atien i ɲu ka i yaki nanmiɛ. Ama, na wɔ kaaki atien kpa abuka su ka, “Fɛmɛ Davidi anuma, si m aɲunfɔ.” ⁴⁹ Na Yesu aka ajina, na wɔ se bu ka, “Am fere i ma m.” Na ba fere anyinsin ni, na ba se i ka, “Ma u ahore si na a yasu, i fere u.” ⁵⁰ Na wɔ fikindi i zaba n atu, na wɔ warakpin, na wɔ ɲmati akɔ Yesu dɔ. ⁵¹ I kɔ juuri dɔ n na Yesu abisa i ka, “A koro ka m yo nzu ma u a?” Na anyinsin n abɔ i nu ka, “Ya Kerefɔ, m koro ka a ma m ɲu asi wɔ.” ⁵² Na Yesu ase i ka, “Kɔ. Yarada n bo a yo m ni, nyini ma a nya laifɛ a.” Kpenga na wɔ kaba aɲu asi, na wɔ su i su akɔ.

11

Kabo Yesu wuraari Yerusalem ka fɛmɛ dɛɛ su ni

¹ Bu kɔ ɲa bu dodo Yerusalem miɛ kpiri n nu, na bu ɲa bu wura miɛm bo bu fere bu ka Befage ni Betani n ni, nyini miɛm n dodo buka n bo bu fere i ka Oliva Buka n wɔ, dama oliva bakam gɔ su wɔ. Dɔ na Yesu asunma i susufɔm n nu nnyɔ, ² na wɔ se bu ka, “Am kɔ miɛ kaan n bo i wo am nyunu dɔ ni, am kɔ ɲa am wura miɛ n nu, am ɲú ka kaakobaa be minda, be nya fun má i. Am nyaɲgi i bra. ³ Nzen be bisaari am ka nzu

ti ye am sunyangi i a, am se i ka am Mibiε ni koro i a, ama, i má am kaaki fa i kpie i nyi ba kisa kisa.” ⁴ Na ba kɔ, na ba kɔ anu ka kaakobaa n minda anɔ be nu atingbere n su, na ba nyangɩ i. ⁵ Na mine n bo bu jina dɔ n abisa bu ka, “Am suyo nzu lεε, am sunyangi kaakobaa n kɔ ni wɔ?” ⁶ Na ba se minem n kabo Yesu seeri bu ni, na ba ma bu atin. ⁷ Na ba fa kaakobaa n aba Yesu dɔ, na ba fa bu suturam anana kaakobaa n ŋu, na Yesu afun atana su. ⁸ Na mine beberebe afa bu suturam atereki ase atin n nu, na nbem gusu abubu nyawa asese atin n nu. ⁹ Na bo bu du i nyunu n ni bo bu wo i sin n kere subo kuyigindi, bu ŋa,

“*Hosana*. Ya kansi Nyeme.

Terefiε wo yiri n bo i suba Micera n dεε
duma n nu n dɔ.

¹⁰ Terefiε wo ya si Davidi femeya n bo i suba
n dɔ.

Ya kansi Nyeme bo i wo angoro ni.”

¹¹ Na Yesu awura Yerusalem mie kpiri n nu, na wɔ kɔ Nyeme Sereebiri Awuru n nu. I kɔ juuri dɔ na wɔ nie abara aye deke n kere. Nyini sanɔga wie ato, nyini ti, na i ni i susufɔ buru ni nnyom n akpie bu nyi akɔ Betani.

Kabo Yesu yoori damba baka be ngbeεn ni

¹² Na i alecin na ba yasu Betani mie n nu sukɔ, na ahɔε ati Yesu. ¹³ Na wɔ nie anu damba baka be ni i nyawa, ka i wo dede, na wɔ kɔ anie ka i nyá suuwa n be di. Sanɔga bo i kɔ juuri baka n bu ni, wɔ ŋu má pui su, baka n jina ni nyawa ŋgumi wɔ, dama nyini sanɔga n ti má damba su sanɔga. ¹⁴ Na wɔ se baka n ka, “Sin nyuma sin,

sono di má u suuwa kun.” I seeri so n na i susufom n ati.

Kabo Yesu fɔnri watafom fiteeri Nyeme Sereebiri Awuru n nu ni

¹⁵ Sanga bo Yesu ni i susufom ko juuri Yerusalem mie kpiri n nu ni, na wo ko awura Nyeme Sereebiri Awuru n nu, na wo fon nenje tofom ni tofom kere afite awuru n nu, na wo kaaki njwaa kaakifom n teebirim n ni tiwa tofom n biem kere alanlaga. ¹⁶ Wo soro ma su na be so sori nati sin Nyeme Sereebiri Awuru n nu. ¹⁷ Na wo kere minem ka, “Ba kere i Nyeme Jore Kadasi n nu ka, Nyeme ja o, ‘M awuru ni, bu ba fere i ka awuru n bo bu ba sere Nyeme n nu fa ma durunya n nufom kere wo.’ Ama, ambere afa i ayo finfom woobiri.”

¹⁸ Nyeme sayoowa donyuyofo nkpienkpienm n ni Nyeme noanie kerefom n tiiri sa n bo Yesu yoori i ni, na ba kpini atin kabo bu yo na bu kun i, dama ba soro i. Deke bo i ti na bu soroori i n la ka, mine donyu tiiri i kereewa n na ba yo alekutura. ¹⁹ Nyini een n naaso, na Yesu ni i susufom n afite mie n nu.

Kabo Yesu seeri ya ka ya yo Nyeme yarada ni

²⁰ Alecin ngarama bu ba susin suko na ba nu ka damba baka n awu ako akpura haari i bunlui. ²¹ Na Peto atenge su kabo Yesu seeri baka n ni, na wo se i ka, “Ya Kerefo, nie. Damba baka n bo anuma na a joko goori i nu ni, wo wu.” ²² Na Yesu ase bu ka, “Am yo Nyeme yarada. ²³ Nahore ye m suse am n a, woro kere bo a se ahin buka n ka, ‘Yasu ko to tieku n nu,’ na a yo ma sika na a yo

yarada ka deke n bo a seeri i ni, i yó, Nyeme yó i ma u. ²⁴ Nyini ti, m suse am wo lee, ka, deke kere bo am sere Nyeme ka am koro i, am yo yarada ka am anya i, Nyeme yó i ma am wo. ²⁵ Saŋga kere bo am ba susere Nyeme, na be ado am ngasi, am fa i mi ni ngasi ce i ka, adena am Si Nyeme bo i wo aŋgoro n gusu fá am dee ce am. [²⁶ Nzen am fa má am beŋgum ngasi ce má bu, am Si Nyeme bo i wo aŋgoro n gusu fá má am dee ngasi ce má am.]”

Kabo bu bisaari Yesu deke bo i yiko n fite ni

²⁷ Bu fa ba juuri Yerusalem mie kpiri n nu bekun, na Yesu awura Nyeme Sereebiri Awuru n nu, na i sunati bara ye i. I wo do so o n na Nyeme sayoowa donɔguyofɔ nkpienkpienm, ni Nyeme noanie kerefom, ni Yudafom nkpienkpienm n aba i do, ²⁸ na ba bisa i ka, “Nma dee yiko nu ye a yo nyini sam kere a? Nma ma u nyini yiko n ye a yo nyini sam n a?” ²⁹ Na Yesu abo bu nu ka, “Am ma m du mo bisa am bisaawa kun be ka, na nzen am boori m nu, na m gusu nya se am deke bo m yiko n fite. ³⁰ Nma maari Yohane atin ye i ba biɛeri minem Nyeme nzue n a? Nyeme nzen adamande? Am bo m nu.” ³¹ Na ba se akuruwa bu nu nu, kabo bu bo Yesu nu barasu. Bu na, “Nzen ya seeri i ka Nyeme maari i atin a, i bisa ya ka, ye nzu ti ye ya da má Yohane nu a? ³² Ama, nzen ya se i ka adamande do?” Do gusu na ba soro jama ni. Má pui ti, dama soɔɔ kere soroori su ka Yohane yo ti Nyeme noanie kanfo o nahore su. ³³ Nyini ti, na ba bo i nu ka, “Ya si má.” Na

yiri gusu ase bu ka, “Mini mmɔɔ sé má am sɔnɔ bo i dɛɛ yiko nu na m yo ahin sam n kɛrɛ ni.”

12

*Kabo Yesu boori miɛenu niiri Yudafɔm nkpiɛn-
kpiɛnm ni*

¹ Na Yesu abo bu miɛenum. I ɲa, “Sɔnɔ be yo woori bɛrɛ a, na wɔ dɔ i baka suuwa barasu be fie, na wɔ kanda abara ayɛ fie ni. Na wɔ lokoti yabue bambaka be kunma, ka i sumiemiɛ baka suuwam ni nzue gɔ nu. Na wɔ ta kpafiri lenlenge be ka bu tana su suniɛ fie n kɛrɛ su, na wɔ nya afa fie n awura i npadifɔm saa nu. Na wɔ kɔ atin. ² Saɲga ba juuri bo i si ka baka suuwam n abi ni, na wɔ sunma i akɔɔm kun i npadifɔm n dɔ ka i kɔ de i dɛɛ bo ba nya i n bra. ³ Akɔɔ n kɔ juuri ni, na ba tara i abo i, na ba fɔn i akpie i nyi i saa ɲgbɛɛn. ⁴ Na fie n fɔ n asunma i akɔɔ n kun bekun, na ba tara i abo i atiɛ i tii, na ba kpa i nyinyɛ. ⁵ Na wɔ kaaki asunma kun bekun, na ba kun yiri. Akɔɔ kɛrɛ bo fie n fɔ n nya sunmaari i a, a ɲu ka bu bo i wɔ, wara bu kun i wɔ. ⁶ Sɔnɔ kun n kpein be ba kaari a, yiri la i wa koroowa ni. Yiri ye i ba kaari sin sunmaari a, na wɔ se ka, ‘Bu má m wa n yiri jirima.’ ⁷ Ama, na nyini npadifɔm n ase bu ɲuɲu nu ka, ‘I wa n bo i dí i aja n lɛɛ suba n a. Am bra na ya kun i na aja n kɛrɛ ká ya dɛɛ.’ ⁸ Dɔ na ba tara i, na ba kun i, na ba cin i afite fie n nu afa i atu.”

⁹ Na Yesu anya ase bu ka, “Am sunsun ka fie n fɔ ni yó sɛ wɔ? I bá kun nyini npadifɔm n kɛrɛ wɔ, na i fá fie n wura miɛ fɔfɔrɛm saa

nu.” ¹⁰ Na wɔ sa su ase ka, “Amberɛ ni am tii akan Nyemɛ Jɔrɛ Kadasi n nu aɲu i kabo ba kɛrɛ i barasu. Bu ɲa,

‘Yabuɛ n bo bondo tafɔm n faari i tuuri ni,
yiri ye wɔ kaaki bondo n jaa yabuɛm kɛrɛ
tii a.

¹¹ Micɛra ni yoori i sɔ a.

Ya ɲu i, na wɔ yo ya alekutura.’ ”

¹² Yesu seeri sɔ ni, na Yudaɔm nkpienkpienm n akpini atin kabo bu yo na bu tara i, dama bu faari nu ka miɛnu n bo i boori i ni, i niiri bɛrɛ wɔ, ama, bu soroori jama n dɛɛ ti, na ba yasɔ akɔ ayaki i.

Kabo bu sɔɔ Yesu ɲɛɛ fa kɔ lampo tɔ busu ni

¹³ Nyini sin na nkpienkpienm n asunma Farasi-
fɔm ni Fɛmɛ Herode minɛ nbem na bu ba sɔ Yesu
ɲɛɛ na bu ti i nɔaniɛ. ¹⁴ Na ba ba ase i ka, “Ya
Kerefɔ, ya si ka a ti nahɔrɛ sefɔ ɔ, u cɛɛ wo mǎ
kabo minɛ jɔjɔ nu, dama a niɛ mǎ sɔnɔ jinaabiri
ti, ama, a kere minɛm wɔ nahɔrɛ su kabo Nyemɛ
atin ti barasu. Tɔ, ya dɛɛ atin n su, atin wo nu ka
ya tɔ lampo ma Romafɔm Fɛmɛ Kpɪri Siza, nzen
atin wo mǎ nu?” ¹⁵ Ama, na Yesu asi ka bu ti
burukɔɔnufɔm wɔ, na wɔ bisa bu ka, “Nzu ti ye
am sukoro ka am sɔ m ɲɛɛ a? Am fa ɲwaa bra
na m niɛ.” ¹⁶ Na ba fa ɲwaa n aba ama i. Na wɔ
de ɲwaa n aniɛ, na wɔ bisa bu ka, “Nɲa dɛɛ tii
ni i duma wo ɲwaa n su n a?” Na ba bɔ i nu ka,
“Fɛmɛ Siza dɛɛ a.” ¹⁷ Na Yesu ase bu ka, “Deke
bo i ti Fɛmɛ Siza dɛɛ, am fa ma Fɛmɛ Siza, na
deke bo i ti Nyemɛ dɛɛ, am fa ma Nyemɛ.” Na ba
miɛ ni i nɔaniɛ ni.

Kabo bu bisaari Yesu fa kɔɔri yiwee tenge jɔɔre su ni

¹⁸ Na Yudafoɔm asese barasu nbem bo bu fere bu ka Sadiusifoɔm ni, aba Yesu do. Bu dee kereewa la ka Nyeme tenge ma minem bu yiwee n nu n a. Na ba ba abisa i jɔɔre be, bu na, ¹⁹ “Ya Kerefo, Moyisi yo kereri noaniɛ be maari ya, ka nzen sono wu yakiiri i yi, na i ni bara n anya ma baa, wo yo daka ka i niema n fa kunafo n na bu wu nbaam ma goɔɔ n bo wo wu ni. ²⁰ To, sono be yo laari nbaabiesom nso, na baakpien n aja bara, na wo wu ayaki bara ni, ba nya ma baa. ²¹ Na bo i to i su n afa kunafo n aja, na yiri gusu awu ayaki bara ni, ba nya ma baa. Na bo i to i su nsan su n gusu afa i aja bekun. ²² I yo so o, na bu nso n kere aja bara n abara aye, na bu kere awu ayaki i, ba nya ma baa, na bara n gusu aba aka sin awu. ²³ Kabo bu mine nso n kere aja bara n na ba wu so ni, cɛen n bo Nyeme ba tenge minem bu yiwee n nu ni, bara ni ka na de wo?”

²⁴ Na Yesu abo bu nu ka, “Am amini atin. Deke bo i ti na am amini atin n la ka, am ti ma deke bo ba kere i Nyeme Jɔɔre Kadasi n nu n bu, na am kaaki si ma kabo i yiko n ti barasu. ²⁵ Dama sanja bo Nyeme ma minem tenge bu yiwee n nu ni, ajaa wo ma bere kun. Ama, nyini cɛen ni, sono kere kaaki ka Nyeme merkem bo bu wo angoro n wo. ²⁶ Na fa ko kabo Nyeme ba tenge minem bu yiwee n nu ni, am kaanri Moyisi dee kadasi ni, nzen am akan ma i? Kabo i kereri fa ko sanja bo sin n jeeri buwe baka n su n na Nyeme jɔɔri i do ni, i na, ‘Mini ti Abraham, ni Izaki, ni Jakobu dee Nyeme n a.’ ” ²⁷ Na Yesu asa

su ase bu ka, “Kabo Nyeme ña i ti nyini minem n dɛɛ Nyeme ni, nyini kere ka bu toko la ñgɔɔ lɛɛ, dama Nyeme ti má bo ba wu n dɛɛ Nyeme, ama, i ti bo bu la ñgɔɔ n dɛɛ Nyeme a. Nyini ti, kabo am ña Nyeme tɛnge má minem bu yiwee n nu, am amini fieo.”

Nyeme ñoaniɛ maawa n bo i tara bu kere n jɔrɛ

²⁸ Na Nyeme ñoaniɛ kerefɔm kun aɲu kabo Sadusifɔm ni Yesu seeri bu beɲgu akuruwa ni, i tiiri kabo Yesu bɔɔri bu nu nyunyumi sɔ ni, na wɔ ba abisa i ka, “Nyeme ñoaniɛ maawam ni, bɔɔɔ tara bu kere a?” ²⁹ Na Yesu abɔ i nu ka, “Ñoaniɛ n bo i tara bu kere n yaa, ba kere ka, ‘Amberɛ Yisarelifɔm, am ti fɛn, ya Micɛra Nyeme n ti kun wɔ. ³⁰ Koro Micɛra u Nyeme ni, ni u ahorembaa kun, ni u awiɛwiɛ, ni u sunsunni, ni u faɲga kere.’ ³¹ Bo i tɔ su nnyɔ n la ka o, ‘Koro u beɲgu kabo a koro u ñu ni.’ Ñoaniɛ maawa be wo má bere bo i tara ahin nnyɔm ni.” ³² Na Nyeme ñoaniɛ kerefɔ n ase Yesu ka, “Aɲgba. Ya Kerefɔ, i nahɔrɛ atin su lɛɛ ye a kan i n a. Ya Micɛra Nyeme n ti kun wɔ. Nyeme be wo má bere sin i ñu. ³³ Wɔ kaaki ayo daka ka ya koro Nyeme ni ya ahorembaa kun, ni ya sunsunni, ni ya faɲga kere, na ya kaaki koro ya beɲgu kabo ya koro ya ñu ni, nyini nnyɔm n ti ye tara bo ya yo tiɛm, ni bo ya yi sarakam ma Nyeme ni.” ³⁴ Na Yesu aɲu ka sɔɔɔ n abɔ i nu kpa, na wɔ se i ka, “A waari má ni Nyeme femɛya ni.” Nyini sin, be abo má su ka i bisa Yesu jɔrɛ bekun.

Kristo Tiidefɔ n bo i ti Feme Davidi anuma n jɔre

³⁵ Sanga bo Yesu woori Nyeme Sereebiri Awuru n nu sukere Nyeme noanie ni, na wo bisa minem jɔre be fa ko Kristo Tiidefɔ n su. I na, “Nzu ti ye Nyeme noanie kerefom n bita jɔjɔ ka Kristo n ti Feme Davidi anuma a? ³⁶ Dama Awiewie Casi n yo wuraari Feme Davidi nu ni, na yiri ni i tii ase ka, ‘Na Micera ase m Mibie n ka, “Ba tana m saa fomboro su fen, haari m ba ma u kpofom kere ba kutu u jaa bu.” ’

³⁷ To, Feme Davidi mmoo ni i tii fereeri Kristo n ka i Mibie wo, ye Kristo n yo se kaaki yo Feme Davidi anuma a?”

Kabo Yesu na mine si bu nu sa ni Nyeme noanie kerefom ni

Ye jama beberebe n jina tiiri Yesu noanie n ni ahorejo a. ³⁸ I woori bu kere n su ni, na wo se bu ka, “Am si am nu sa ni Nyeme noanie kerefom ni, deke bo bu koro i n la ka, bu wura sutura ngbingbirim wo, na bu nati sujengbe, na soro kere suyo bu anse goosu. ³⁹ Nyini minem n anya awura bu tientienbunoo soom n nu ni, wara ba nya afere bu tientienbunoo bambaka diire diibirim ni, bu koro ka bu tana kpirikoro tanaabirim wo. ⁴⁰ Nyini minem n so fin nkunafom nengem wo, na bu jina sere Nyeme ce, adena minem nu ka bu ti mine kpam wo. Jina ceen, bere ba nya suicin tara minem kere.”

Kabo kunafɔ be yiiri saraka barasu ni

⁴¹ Na Yesu ako atana adodo alaka bo minem yi bu saraka nwaa wura nu ni, na i sunie kabo minem yi saraka barasu. Nengefom dongu yiiri nwaa beberebe wuraari saraka n nu. ⁴² Na kunafo yaariffo be gusu aba ayi nwaa kaan be bo i koro to ma pui awura saraka n nu.

⁴³ Do na Yesu afere i susufom n na wo se bu ka, "Nahore ye m suse am n a, nyini kunafo n ayi nwaa atara minem n kere. ⁴⁴ Dama nengefom la nwaa beberebe n de ti, ye ba yi be a. Ama, nyini kunafo n ni i yaari n kere, i deke kere bo i la i le, ye wo yi i n a."

13

Kabo Yesu seeri ka Nyeme Sereebiri Awuru ni ba bereki barasu ni

¹ Sanga bo Yesu sufite Nyeme Sereebiri Awuru n nu ni, na i susufom n nu kun be aba ase i ka, "Ya Kerefo, nie nyini yabue ngbingbirim ni. Nie kabo bu ti a. Nie nyini awuru bambaka ni. Nie kabo ba ta i barasu a." ² Na Yesu ase i ka, "M na a nu nyini ataari ngbingbirim n e? Yabue kun n kpein n mmoo ba nana ma i benngu su. Bu ba bereki i kere go o le."

Kabo Yesu kere fa kori durunya n awieeri su de jore ni

³ Na Yesu ako afun atana Oliva Buka n su sunie Nyeme Sereebiri Awuru ni. Na sanga bo yiri ni Petoro ni Yakobo ni Yohane ni Andere woori bu ngumi ni, na ba bisa i ka, ⁴ "Ya Kerefo, se ya, sanga bono ye ahin sam n kere ba yo a? Ye nzu deke ba kere ya ka sanga n adodo bo nyini sam n

kerε bá yo a?” ⁵ Na Yesu anya ase bu ka, “Am si am ηu sa na má am ma be dadaka am. ⁶ Dama mine dɔŋgu bá fa m duma n ba, na bu sé ka, ‘Yiri la mini n a.’ Na bu dádaka mine beberebe. ⁷ Saŋga bo am bá ti aluwa ŋga fεn, wara bu sukun lue dɔ, má am ma am ahore saaki. Wɔ yo daka ka nyini n kerε bá yo ka, ama, má am nie ka durunya n awieeri lεε. ⁸ Daanfie daanfie bá kun lue ni bu beŋgum, na nfemem kún lue ni bu beŋgu nfemem. Na asien bá kpisi awɔre awɔrem nu, na ahɔe tó. Nyini n kerε bá yo kabo bara kutu cεen bumboori dεε wahara n ti n wɔ.

⁹ Am si am ηu sa, dama bu bá fa am wura jɔredifɔm saa nu, na bu bó am bu tientienbunɔɔ soom n nu. Mini dεε ti, na bu dí am jɔre gominam ni nfemem nyunu. Nyini má am atin, na am di m daani kere bu a. ¹⁰ Ama, wɔ yo daka ka daanfie kerε du mɔ ti labari kpa n ka, ye durunya n awieeri bá ju a. ¹¹ Saŋga n bo bu bá faari am kɔɔri jinaabiri, na bu kɔ di am jɔre ni, má am ma am ahore saaki fa kɔ kabo am kó jɔjɔ barasu. Nɔanie kerε bo i tó am nɔɔ nyini saŋga ni, am jɔjɔ i, dama i fíte Awiewie Casi n dɔ ɔ, i fíte má am dɔ.

¹² Gɔrɔm ni niemam bá tɔ bu beŋgu ma bu kpɔfɔm na bu kún bu, na sim tó bu nbaam, na nbaam kéte bu wufɔm ηu, na bu má minem kun bu wufɔm ni. ¹³ Ama, wɔrɔ kerε bo a mindi deeri nyini n kerε kɔ ju i awieeri, Nyeme dé u tii ji.”

Anyumbaa ciire sa n bo i bá ba n jɔre

¹⁴ Na Yesu akaaki ase bu ka, “Am bá ηu anyumbaa ciire sa be bo Nyeme mmɔɔ kpɔ i,

ka bu má i jina Nyeme Sereebiri Awuru n nu, deke bo wo yo má daka ka i jina, na i sáaki i ni. Ma sɔnɔ kere bo i kan ahin kadasi n ti i bu nyunyumi. Nyini saŋga ni, wɔrɔ kere bo a tiiri i ŋga, na a wo Yudiya asien n su, ŋmati kɔ bukam n su. ¹⁵ Wɔrɔ kere bo a wo kpata nu, má a wura gisan n nu fa pui. ¹⁶ Na wɔrɔ kere gusu bo a wo fiesu, má a kpie u nyi kɔ awuru kɔ fa u sutura be. ¹⁷ Nyini saŋga ni yó kekere agaya ma nyinsefɔm, ni nbaram bo bu nbaam toko nu ni. ¹⁸ Am sere Nyeme ka má nyini sa n yó buke saŋga. ¹⁹ Nyini saŋga ni, wahara bo mine dí i, i tára wahara kere bo ba di i asin, fite saŋga n bo Nyeme yiiri durunya ni haari ni kisa, nyini wahara n ŋusu bá má kun. ²⁰ Ama, Mícera n akpie nyini saŋga n su. Nzen má wo kpie má i su, má sɔnɔ wo má bere bo i nyá ŋɔɔ, ama, i dɛɛ tienɔgu minɛm bo wo yi bu n dɛɛ ti, wo kpie saŋga n su a. ²¹ Nyini saŋga ni, nzen be bá se am ka, ‘Am niɛ, Kristo Tiidefɔ ni wo fen n a,’ wara ‘Am niɛ, yiri wo dɔ n a,’ má am de i mi nɔaniɛ ni. ²² Dama kɔrefɔ nbem bá ba na bu yó bu ŋu ka bere ti Kristo n a, na nbem gusu yó bu ŋu ka bu ti Nyeme nɔaniɛ kanfɔm wo. Bu yó alekutura sam beberebe fa kere am, na nzen bu koro nyaari atin, bu dádaka Nyeme dɛɛ minɛm bo wo yi bu ni. ²³ Amberɛ, ma se am i kere wo læ ka, na saŋga n nyá ba ju. Am si am ŋu sa.”

Kabo Adamande Wa ni bá kaaki ba barasu ni

²⁴ Na Yesu akaaki ase bu ka, “Saŋga bo nyini wahara n kere ba siinri,
‘Awosin káta wie n su,
na sara n gusu tá má bo minɛm ŋu i.

25 Na asarambaam fíte angoro titi toto,
na angoro n kere kpísi.’

26 Na minem nyá ñu ka mini Adamande Wa ni sufite angoro yinyingu n nu suje piepieu suba ni yiko bambaka. 27 Na m nyá sunma Nyeme merékem durunya n awore n kere nu, na bu tíentien Nyeme minem bo Nyeme ayi bu durunya n nu n kere noo.”

Kabo Yesu ña ya fa damba baka fa se nyaari barasu ni

28 Na Yesu akaaki ase ka, “Am fa damba baka n fa se nyaari. Sangá bo am ba ñu ka i nyawa akpɔnkpɔn, na i sufiefie fɔfɔre ni, am si ka dɔdɔori sangá adodo lee. 29 Mini Adamande Wa n ba ni bá yo so o. Sangá bo ambere gusu bá ñu ka nyini sam kere bá suyo ni, am si tenle su ka sangá n adodo lee, i cé má kun. 30 Nahore ye m suse am n a, ka bo bu la ngoo kisa n wú wie má ka, ye nyini sam kere bá yo a. 31 Angoro ni asiengu kere bá la awieeri, ama, m dee noanie n yiri la má awieeri ceen be.”

Kabo Yesu seeri ka ya si ya ñu sa fa ko i ba n su ni

32 Na Yesu akaaki ase ka, “Be si má sangá ni, wara ceen n bo m bá kpie m nyi ba ni. Haari Nyeme merékem n bo bu wo i do ni, ni mini bo m ti i wa n mmoo si má. Má ka ya Si Nyeme ngumi si a. 33 Nyini ti, am si am ñu sa. Má am fa am ñu ji, dama am si má sangá n bo m bá ni. 34 Mini Adamande Wa n baawa ni bá yo ka sono be ye wo yasu i dika ka i ko atin. Sangá bo i ba sukɔ ni, na wo fa i awuru n awura i

akoom saa nu, na wo ma bu kere ni bu juma bo bu yo. Na wo se danmindafɔ n ka má i fa i ɲu ji haari fa kɔ sanɔa bo i bá ba. ³⁵ Ambere mmɔɔ si má sanɔa bo mini Awurufɔbie ni bá ba. Nzen ɲgarama a? Naaso ɔ? Kɔɲgue jinanjin? Akɔnyuma bo sanɔa? Be si má. Nyini ti, má am fa am ɲu ji, ³⁶ na má am daafi na m bá fura am nu. ³⁷ Deke bo m sujɔɔ se am ni, m jɔɔ ni sɔɔ kere pepere wo lee, ka, má am fa am ɲu ji na am daafi.”

14

Kabo bu seseeri su na bu tára Yesu ni

¹ Nyini sanɔa ni, wo ka lennyɔ ɔ, na bu di bu cɛɛnkpiri nbem. Bu fere kun n ka Butara cɛɛnkpiri, bo bu di i na bu tenɔe su kabo Nyeme yo deeri bu nam tii fiteeri Ijipitifɔm asien su ni. Na kun la bo bu di i ni kpɔɔ bo bu gɔ má ayiri nu na i yasu ni. Na Nyeme sayoowa dɔɲguyɔfɔ nkpienkpienm ni, ni Nyeme nɔaniɛ kerefɔm ni, anienie atin kabo bu yó barasu na bu tára Yesu kun i fieɛwa nu. ² Na ba se bu ɲuɲu nu ka, “Má am ma ya yo i cɛɛnkpiri n sanɔa. Má nyini, minem ni kéte yo nanmie wo, na bu sutientien.”

Kabo bara be gɔɔri Yesu tii su tulaaleɛ ni

³ Yesu woori Betani mie n nu wo, sɔɔ be dika, bu fere i ka Simon, i yo ti kokofɔ ɔ. Sanɔa bo Yesu wo diire di su ni, na bara be aba ni tulaaleɛ tuwa nvanvani bo i la gɔ agaya. Na wo bo abu tulaaleɛ tuwa n nɔɔ, na wo kaaki tulaaleɛ n kere ago Yesu tii su. ⁴ Na yaa ati minem ni nbem bo bu wo dɔ ni, na ba se bu ɲuɲu nu ka, “Nzu ti ye

wɔ saaki tulaaleɛ n sɔ a? ⁵ Má ya tɔɔri i, má ya nyá ɲwaa beberebe, na ya fá ma yaarifɔm.” Na ba kan bara ni ndiɛ agaya. ⁶ Na Yesu ase bu ka, “Am yaki i benlɛ. Má am kan i ndiɛ. Sakpa lɛɛ ye wɔ yo ama m n a. ⁷ Am ni yaarifɔm ni wo bere sanɔa kɛrɛ a, na nzen sanɔa be am ba koro ka am yo bu sakpa, am yo bu. Ama, mini, m wo má am dɔ sanɔa kɛrɛ. ⁸ Wɔ yo i dɛɛ fanɔa nyaari lɛɛ, wɔ kaaki tulaaleɛ n agɔ m ɲu ka i dɛɛ nzee bo wɔ fa ayo m siriya fa kɔ m yiwee cɛɛn lɛɛ. ⁹ Nahɔrɛ ye m suse am n a, deke kɛrɛ bo bu bá kaanri Nyɛmɛ labari kpa ni durunya n kɛrɛ nu, bu kán i sayoowa n na minem tenɔe i su.”

Kabo Yudasi sɛsɛɛri su ka i tɔ Yesu ni

¹⁰ Na Yudasi Isikariyoti bo i ti Yesu susufɔ buru ni nnyɔm ni kun be ni, akɔ Nyɛmɛ sayoowa dɔɲɔguyofɔ nkpienkpiɛnm ni dɔ, ka i kɔ tɔ Yesu ma bu. ¹¹ Bu tiiri labari n sɔ ni, na bu ahore ajo, na bu gusu atan ndiɛ ama i ka bu má i ɲwaa. Na Yudasi akpini atin kabo i yó barasu na bu nya Yesu taraabiri.

Kabo Yesu ni i susufɔm diiri cɛɛnkpiri diire ni

¹² Na cɛɛnkpiri n bo bu di i ni kpɔnɔ bo bu gɔ má ayiri nu na i yasu ni, i lekun cɛɛn, nyini cɛɛn ye bu kun nbɔmbaam bo bu di na bu tenɔe Butara cɛɛnkpiri n su n a, na Yesu susufɔm n abisa i ka, “A koro ka ya kɔ ni kɔ sɛsɛ Butara cɛɛnkpiri n diire n su se a?” ¹³ Na Yesu afere bu nu nnyɔ na wɔ se bu ka, “Am kɔ miɛ n kunnu. Am ni sɔnɔ be yé. I sɔ nzue dundu. Am su i su, ¹⁴ kɔ awuru n bo i kó wura nu ni, na am bisa awurufɔbiɛ n ka, ‘Ya Kerefɔ n ɲa, sɔɔ bɔnɔ nu

ye i ni i susufom ni dí Butara cɛenkpiri n diire n a?’ ¹⁵ Na i kére am aŋgoro sɔɔ bambaka n bo ba yo i dɔŋgu ase ni, dɔ ye am sése diire n su se ya.” ¹⁶ Na i susufom ni akɔ miɛ n nu, na ba kɔ aŋu deke n kére sɔ, kabo Yesu seeri bu ni, na ba sɛse Butara cɛenkpiri diire n su.

¹⁷ Na naaso saŋga, na Yesu ni i susufo buru ni nnyom ni kére aba dɔ. ¹⁸ Na saŋga bo bu tana wo diire n di su ni, na Yesu ase bu ka, “Nahɔre ye m suse am n a, am nu kun bá tɔ m ma m kpɔfom a. I mi ni mini susaŋga di diire n a.” ¹⁹ Na bu ahore asaaki, na bu kun kun n kére abisa i ka, “Ye m ŋa má mini yiri e?” ²⁰ Na Yesu abɔ bu nu ka, “Amberɛ buru ni nnyom nu kun yó nyini a, i mi ni mini susaŋga fa ya saa wura taale kun nu a. ²¹ Mini Adamande Wa ni wú kabo ba kére i Nyeme Jɔre Kadasi n nu ase ka m wú n wɔ, ama, sɔnɔ n bo i tó mini Adamande Wa n ni, i mi bá ŋu anyumboro. Má ba wu má i mi n mmɔɔ, má i ti ye.”

Ya Mibie kasin diire n jɔre

²² Saŋga bo Yesu ni i susufom ni wo diire n di su ni, na Yesu afa kpɔnɔ, na wɔ da Nyeme asi, na wɔ bubu i nu, na wɔ fa ama bu, na wɔ se bu ka, “Am de ahin kpɔnɔ n na am di, i ti m ŋuniɛmbaa a.” ²³ Na wɔ kaaki afa awa ni nzan, na wɔ da Nyeme asi, na wɔ fa ama bu, na bu kére anu be. ²⁴ Na wɔ se bu ka, “Ahin nzan n ti m mbunja lɛɛ, ye m sufa ma am n a. Yiri ye Nyeme sufa sɛsesu na i di i di n a. Minem dɔŋgu satie dɛɛ ti, ye m mbunja ni songi gɔ a.” ²⁵ Na wɔ kaaki ase bu ka, “Nahɔre ye m suse am n a,

m nú má nzan be kun, má ka cεεn n bo m bá nu i fofore Nyεμε femeya n nu ni.”

Kabo Yesu seeri i susufom n ka bu bá ηmati yaki i ni

²⁶ Nyini sin na ba di jue akansi Nyεμε, na ba fite ako Oliva Buka n su. ²⁷ Na Yesu ase i susufom n ka, “Am kere bá ηmati yaki m, dama ba kere i Nyεμε Jore Kadasi n nu ka, Nyεμε ηa, ‘M bó kun boesasafó ni, na nbεem bá sandi.’”

²⁸ Ama, m bá tengeeri m yiwee n nu ni, m dú am mɔ kɔ Galili awɔre n nu.” ²⁹ Na Petoro ase i ka, “Nzen ahinm kere ηmati yakiiri u, mini ηmáti yaki má u da.” ³⁰ Na Yesu ase Petoro ka, “Nahɔre ye m suse u a, nyuma kɔngue n nu, kana akonyuma bá bo kpe nnyɔ su, a kéte kpe nsan ka a si má m.” ³¹ Na Petoro abo i hoe ase i ka, “Mini sé má sɔ da. Nzen haari wɔ yo daka ka mini ni wɔrɔ kere sánga wu mmɔɔ, ya wú ɔ.” Na i susufom n kere ase sɔ.

Kabo Yesu jeke tiiri na i kɔ sereeri Nyεμε ni

³² Na ba yasu ako aju awɔre be bo bu fere i ka Geεmane ni, na Yesu ase i susufom ni ka, “Am tana fen ηminda m, na m kó sere Nyεμε.” ³³ Na wɔ fa Petoro ni Yakobo ni Yohane na ba kɔ mɔ kaan. Bu kɔ juuri dɔ na ahoresaaki aba i dɔ agaya, na i jeke ati. ³⁴ Na wɔ se bu ka, “Ahoresaaki aba m dɔ agaya, i yo m ka m wú ɔ mmɔɔ. Am wo fen na am ηminda m. Má am daafi.” ³⁵ Na wɔ kɔ dede kaan, na wɔ butu i kunnu su, na wɔ sere Nyεμε ka nzen má i koro ma ahin anyumboro n sin yaki i. ³⁶ I ηa, “Abba,” i bu la ka, “M Si, wɔrɔ koro yo sa kere a. Nyini

ti, yi m fite ahin anyumboro n bo i suba m dɔ n nu. Ama, má a yo kabo m koro ni, se kabo a koro ni.”

³⁷ I sere Nyɛmɛ wieeri ni, na wɔ kpie i nyi akɔ aɲu ka i susufɔ nsanm ni wo daafiri su. Na wɔ tenge bu na wɔ se Simon Petoro ka, “Simon, a daafi wɔ? A koro kpie má daafiri, haari kaan sɔ mmɔɔ?” ³⁸ Na wɔ kaaki ase bu ka, “Am kpie daafiri, na am sere Nyɛmɛ, adena má deke be yo am na am wura satie nu. Ahorembaa n koro nyɛmesu, ama, aɲuniɛmbaa n ayɔrɔki.” ³⁹ Na wɔ kaaki akɔ asere Nyɛmɛ bekun ni nyini nɔanie jɔjɔwa kun bo i du mɔ jɔjɔri ni. ⁴⁰ Na wɔ kpie i nyi aba i susufɔm n dɔ, na wɔ ba aɲu ka ba daafi bekun, dama daafiri ati bu agaya. Ba koro ase má i pui.

⁴¹ Na wɔ kɔ asere Nyɛmɛ kpe nsan su, akaaki aba aɲu ka bu toko wo daafiri su, na wɔ se bu ka, “Am toko daafi yi am ɲumi wɔ? Wɔ se su. Saɲga n aju, wɔ tɔ mini Adamande Wa ni ama satieyɔfɔm. ⁴² Am nie, sɔnɔ n bo wɔ tɔ m lɛɛ. Am yasu na ya kɔ.”

Kabo bu taraari Yesu barasu ni

⁴³ Na saɲga bo Yesu toko wo jɔjɔri su ni, na Yudasi bo i ti Yesu susufɔ buru ni nnyɔm nu kun aju ni jama beberebe. Bu bita takobem ni kɔrɔmam. Nyɛmɛ sayoowa dɔnguyɔfɔ nkpienkpienm n ni Nyɛmɛ nɔanie kerefɔm ni, ni Yudafɔm nkpienkpienm ni sunmaari bu a. ⁴⁴ Na Yudasi bo i tɔɔri Yesu ni akere jama n nyaari su kabo bu sí Yesu na bu tara i. I ɲa, “Sɔnɔ n bo m kó biti i ni, yiri lɛɛ. Am tara i, na am

bita i kenken, na am fa i kɔ.” ⁴⁵ Saŋga bo i kɔ juuri ni, i kaba kɔɔri Yesu dɔ ɔ, na wɔ bo afere i ka, “Ya Kerefɔ.” Na wɔ biti i, na wɔ yo i anse. ⁴⁶ Na minem n atara Yesu na ba bita i kenken. ⁴⁷ Na Yesu susufɔm bo bu jina bere n nu kun acin ayi i takobe, na wɔ kpɛ sɔnɔ be sui, nyini sɔnɔ n ti Nyeme sayoowa dɔnguyofɔm kpɛn n akɔɔ ɔ. ⁴⁸ Na Yesu abisa bu ka, “M ti finfɔ ɔ ye am fa takobem ni kɔrɔmam na am ba tara m a? ⁴⁹ Cɛen kere cɛen m ni ambere wo Nyeme Sereebiri Awuru n nu a, ye m kere minem a, ama, am atara m á m. Tɔ, i ti ye ni ka kabo ba kere i Nyeme Jɔre Kadasi n nu ka bu yó m ni yo yiiwa.” ⁵⁰ Na i susufɔm n kere aɲmati ayaki i.

⁵¹ Na gbefene be gusu su Yesu su. I kara tani ŋgumi wɔ. Na ba laandi ka bu tara i, ⁵² na wɔ foro bu saa aɲmati ayaki tani ni, i bu ŋgbɛn.

Kabo bu fa Yesu kɔɔri jɔre diibiri ni

⁵³ Na ba fa Yesu akɔ Nyeme sayoowa dɔnguyofɔm kpɛn n dika, na Yudaɔm teretereɔm kere aba atien bu nɔɔ. Bere la Nyeme sayoowa dɔnguyofɔ nkpienkpienm ni, ni Yudaɔm nkpienkpienm ni, ni Nyeme nɔanie kereɔm ni. ⁵⁴ Na Petoro asu Yesu su, ama, i woori dede kaan ni yiri, na wɔ kɔ awura Nyeme sayoowa dɔnguyofɔm kpɛn n dika gisan nu. Na wɔ kɔ asaŋga atana tintinijinaɔm n nu atun sin. ⁵⁵ Na Nyeme sayoowa dɔnguyofɔ nkpienkpienm ni, ni Yudaɔm teretereɔm n kere anienie minem bo bu bá di daani fa kɔ ŋgasi bo Yesu ado i ni, adena bu nya i taraabiri na bu kun i, ama, ba nya m á jɔre bo bu fa kpɛ sɔ i. ⁵⁶ Na daani difɔm

beberebe afite ajina akpie kore aso Yesu, ama, bu noanie n ayo má kun. ⁵⁷ Na mine nbem gusu ayasu ajina akpie kore aso Yesu, ⁵⁸ bu na, “Ya tiiri ka i na, i fúfu ahin Nyeme Sereebiri Awuru n bo minem taari i ni, na lesan afien, na i káaki ta fofore bo i ti má kabo adamande ataari ti ni.” ⁵⁹ Haari ni nyini n mmoo, bu noanie ni ayo má kun.

⁶⁰ Na Nyeme sayoowa donguyofom kpien ni ayasu ajina tereterefom n afien, na wo bisa Yesu ka, “A la má bonu be fa ko ahin jore n bo minem ni akpie aso u n su?” ⁶¹ Ama, na Yesu amo i noo, wo bo má jore be nu.

Na Nyeme sayoowa donguyofom kpien ni abisa i bekun ka, “Woro ti Nyeme n bo ya kere kansa i n dee Wa, Kristo Tiidefo n a?” ⁶² Na Yesu abo i nu ka, “Mini lee. Na

‘am bá nu mini Adamande Wa ni, ka m tana Nyeme Yikofa n saa fomboro su, na am nu ka m fite angoro yinyingu n nu suba.’ ”

⁶³ Yesu bo nu so wieeri ni, na Nyeme sayoowa donguyofom kpien ni ason i tanlee. Na wo se ka, “Ya koro má daanifo bekun. ⁶⁴ Ambere mmoo ti kabo wo joro awura Nyeme ngasi n nu e. Ye am na se wo?” Na bu kere ase ka wo kan ciire jore, nyini ti, wo yo daka ka i wu. ⁶⁵ Bu kaanri so wieeri ni, na bu nbem ayi nanzue ago Yesu nu, na ba fa sanvuin acin akata i nyumbaa, na ba bobo i, na ba se i ka, “Woro Nyeme noanie kanfo ni, kan kere ya sono n bo i boori u ni.” Na tintinijinafom n gusu afinfin i nyoonu.

Kabo Petoro keteeri ka i si má Yesu ni

⁶⁶ Bu wo nyini kere su ni, na Petoro toko wo gisan n nu, na afani be aba i bi, yiri ti Nyeme sayoowa dɔnguyofɔm kpien n deɛ afani kun a. ⁶⁷ Saŋga bo i nie ŋuuri Petoro ka i wo sin tuun-biri n ni, na wɔ nie Petoro nyunu dika gbirim, na wɔ se i ka, “Wɔrɔ mmɔɔ yo woori nyini Yesu Nazaretifo n dɔɔ.” ⁶⁸ Na Petoro akete, i ŋa, “Ai, m si má nyini jɔre n bo a sujɔɔ i ni.” Na wɔ fite gisan n nu aba lee n nu. Nyini saŋga ni na akɔnyuma abo kpekun. ⁶⁹ Na afani n aba aŋu i dɔ, na wɔ kaaki ase minem bo bu jina bere ni ka, “Ahin sɔnɔ n ti bu nu kun wɔ.” ⁷⁰ Ama, na Petoro akete bekun.

Wɔ ce má na bo bu jina bere n gusu ase Petoro ka, “Nahɔre a, a ti bu nu kun wɔ, dama wɔrɔ mmɔɔ ti Galilifo ɔ.” ⁷¹ Na wɔ tan ndie afa i saa awura sin nu, i ŋa, “M si má sɔnɔ n bo am sujɔɔ i jɔre ni.” ⁷² Kpenŋa na akɔnyuma n abo kpe nnyɔ su, na Petoro atenŋe su kabo Yesu seeri i ni, i ŋa, “Kana akɔnyuma bá bo kpe nnyɔ su, a kéte kpe nsan su ka a si má m.” Na i ahore asaaki, na wɔ sun.

15

Kabo bu faari Yesu kɔ jinaari Gomina Pilato nyunu ni

¹ Na alecin saŋga na Yudafɔm tereterefɔm kere atien bu nɔɔ. Bere la Nyeme sayoowa dɔnguyofɔ nkpienkpienm ni, ni Yudafɔm nkpienkpienm ni, ni Nyeme nɔanie kerefɔm ni. Na ba tana asese su kabo bu yó Yesu. Na ba wura i jɔrɔkɔ, na ba fa i akɔ ama Gomina Pilato. ² Na Gomina Pilato abisa i ka, “Wɔrɔ ti Yudafɔm feme n a?” Na wɔ bo i nu

ka, “Kabo a jɔɔ ni, i ti sɔ ɔ.” ³ Na Nyemɛ sayoowa dɔɔguyofɔ nkpienkpienm ni akpiɛ jɔrɛ beberebe asɔ i. ⁴ Na Gomina Pilato abisa i bekun ka, “A la má nɔaniɛ bo a bɔ bu nu? Niɛ jɔrɛ beberebe bo ba kpiɛ asɔ u a.” ⁵ Ama, Yesu abɔ má jɔrɛ be nu, na Gomina Pilato abirisi kabo Yesu abɔ má nu ni.

⁶ Afɔ kɛrɛ afɔ Butara cɛɛnkpiri n nya ba ju ni, Gomina Pilato yi dansaraka n bo jama n sere i ka i yi i ji n wɔ. ⁷ Nyini sangɔ ni sɔɔ be woori dansaraka sɔɔ n nu dɔ, bu fere i ka Barabasi. Sangɔ be minɛm yo keteeri gomina n ɔu wɔ, na ba tu luɛ, na i ni i beɔgu ketemafɔ nbem akun minɛm, nyini ti, na ba tara bu anyi bu dansaraka. ⁸ Tɔ. Kabo afɔ kɛrɛ afɔ Gomina Pilato n yi dansaraka n kun ma bu ni, na jama n aba atien bu nɔɔ i bi na bu kere sɔɔ n bo i yí ma bu ni. ⁹ Na Gomina Pilato abisa bu ka, “Am koro ka m yi Yudafɔm fɛmɛ ni ma am a?” ¹⁰ I seeri sɔ ni, dama i si tenle su ka Nyemɛ sayoowa dɔɔguyofɔ nkpienkpienm ni si Yesu kɔrɛ ti ye bu faari i ba wuraari i saa nu a. ¹¹ Na Nyemɛ sayoowa dɔɔguyofɔ nkpienkpienm n awura jama n bu sin ka bu se Gomina Pilato ka i yi Barabasi ji ma bu. ¹² Na Gomina Pilato abisa bu ka, “Ye ahin sɔɔ n bo am fere i ka Yudafɔm fɛmɛ ni, am koro ka m yo i sɛ wɔ?” ¹³ Na jama n atien ase ka, “Kpama i baka jaanu n su na i wu.” ¹⁴ Na Gomina Pilato ase bu ka, “Ye nzu satie ye wɔ yo i a?” Ama, na ba kaaki atien agaya bekun ase ka, “Kpama i baka jaanu n su na i wu.” ¹⁵ Dɔ na Gomina Pilato akoro ka i jɔ jama n ahore, nyini dɛɛ ti, na wɔ yi Barabasi aji, na wɔ ma sojam afin Yesu ɔgbere, na wɔ nya afa i awura bu saa nu ka bu kɔ kpama i baka jaanu

n su na i wu.

Kabo bu yoori Yesu anzasi ni

¹⁶ Na ba fa Yesu awura gomina n gisan n nu, na ba fere bu benju sojam kere ka bu tien bu nɔɔ. ¹⁷ Na ba wura Yesu tanlee kɔkɔre yorom ka femeya tanlee su, na ba fa buwe aɲɔ i ka kaba dee su, na ba fa aforo i tii ka femeya kere dee su, adena bu yo i anzasi. ¹⁸ Na ba yo bu ɲu ka bu suma i jirima, bu ɲa, “Yudafom Feme ni, ya yo u anse.” ¹⁹ Na bu sufinfin i tii baka, na bu suyi nanzue go i ɲu, na bu sukutu i nyunu. ²⁰ Bu ba yoori i anzasi n wieeri ni, na ba yi tanlee kɔkɔre yorom ni, na ba kaaki afa i tienju dee sutura n awura i. Na ba nya afa i akɔ ka bu kɔ kpama i baka jaanu n su.

Kabo bu kpamaari Yesu baka jaanu n su ni

²¹ Sanga bo bu sukɔ ni, na bu ni Sirenefo bie be aye, bu fere i ka Simon, Alekizanda ni Rufusu si lee. I fite aheme suba mie kunnu, na sojam n amie i ka i so Yesu baka jaanu ni. ²² Na ba fa Yesu akɔ deke bo bu fere i ka *Gologota* ni, *Gologota* n bu la ka Tereawa Woobiri. ²³ Na mine nbem asanga nzan ni ayiri barasu be ama i ka i nu, na i jo yaari, ama, wo nu ma i. ²⁴ Bu yoori nyini n kere wieeri ni, na ba nya akpama i baka jaanu n su, na ba ye i su ajina, na ba tu mbaa na bu si kabo bu kpaaki i suturam nu, bu ɲuɲu nu.

²⁵ Bu kpamaari i baka jaanu n su ngarama kerefi ngona a. ²⁶ Na ba kere jore n bo bu kpie soori i ni, na ba fa abo akpama i baka jaanu n tii su, kerewa n la ka, “Yudafom Feme n lee.” ²⁷⁻²⁸ Na ba kpama finfo nnyo nbem baka jaanu su

adodo i, bu kpamaari kun i saa fomboro su wo, na ba kpama kun n gusu i saa bie su. ²⁹ Na minem kere bo bu sin do ni subobo bu tii, na bu sukpie i nzuko, bu na, "Eenhēen, woro bo a na a fufu Nyeme Sereebiri Awuru n na a kaaki ta i lesan afien n le, ³⁰ jura baka jaanu n su na a de u tii ji." ³¹ Na Nyeme sayoowa donyuyofonkpienkpienm ni, ni Nyeme noanie kerefom ni gusu suyo i anzasi bu nyu nu, bu na, "Wo de minem tii aji, ama, i sukoro de ma yiri ni i tii. ³² Am ma ya nie Yisarelifom Feme n bo i na i ti Kristo Tiidefo ni, nzen i koro juraari baka jaanu n su kisa kisa, ya yo i yarada." Na mine nnyom ni bo bu kpamaari bu dodoori i ni mmoo akpie i nzuko.

Kabo Yesu wuuri ni

³³ Wiesu kerefi buru ni nnyo sanja na awosin akata asien n kere su, haari naaso kerefi nsan. ³⁴ Na nyini sanja ni, na Yesu abo awie kpa ase ka, "Eli, Eli, lama sabatani?" I bu la ka, "M Nyeme, m Nyeme, nzu ti ye a yaki m aji a?" ³⁵ Na minem nbem jinaari bere, bu nbem n tiiri so ni, na ba se ka, "Am so am sui na am ti, i sufere Eliya." ³⁶ Na bu kun nu anmati afa mene ado nzan gagaraki be nu, na wo fa awo baka su alaandi ato Yesu noo ka i nu, na wo se ka, "Am yaki i na ya nie, ka Eliya ba jura i baka jaanu n su." ³⁷ Na Yesu abo awie kpa kpekun, na wo nya ayo Nyeme de. ³⁸ Na tani bambaka n bo bu fa kpaakiiri soo casi n bo i wo Nyeme Sereebiri Awuru n nu n ati nu nnyo, fa i angoro ko jura asienngu. ³⁹ Na soja kpien n bo i jinaari baka jaanu n nyunu nyuuri

kabo Yesu boori awie na i wuuri barasu ni, na wɔ se ka, “Ahin sɔnɔ n ti Nyeme Wa a nahɔre su.”

⁴⁰ Na nbara nbem ajina dede sunie Yesu. Bu nu nbem la Mariya bo i fite Magadala mie n nu ni, ni Salome, ni Mariya n bo i nbaam la Yakobo kaan n ni Yose. ⁴¹ Bere yo suuri Yesu su wɔ sanɔga bo i wo Galili awɔre n nu na bu subuka i. Nbaram beberebe gusu yo woori dɔ bo bu suuri i su baari Yerusalem mie kpiri n nu.

Kabo bu yoori Yesu sutura barasu ni

⁴² Kabo nyini cɛen n tiiri Njumiya cɛen n kpokpo cɛen ni, i naaso wie, ⁴³ na Yosefu bo i fite Aramatiya mie kpiri n nu ni, na wɔ fa ahoresi na wɔ kɔ anɔ Gomina Pilato, na wɔ sere i ka i fa Yesu njunie n ma i. Yosefu yo ti sɔnɔ jirimafɔ ɔ Yudafɔm tereterefɔm n nu, na i sunsunni kere yo la ka, i njinda sanɔga bo Nyeme bá di i femeya n wɔ. ⁴⁴ Gomina Pilato tiiri kabo wɔ se ni, na wɔ yo alekutura kabo Yesu akaba awu ni. Na wɔ sunma afere soja kpian n na i bisa i na i ti ka Yesu wuuri ni, wɔ ce? ⁴⁵ I tiiri soja n noanie wieeri ni, na wɔ ma Yosefu atin ka i kɔ fa i njunie ni. ⁴⁶ Na Yosefu ato nzee, na wɔ yi fuin n baka jaanu n su, na wɔ fa nzee ni apɔɔndi i. Na wɔ kɔ afa i awura yabue bue bo ba lokoti i ayo i fanɔkunma n nu, na wɔ fa i ase nu, na wɔ kundu yabue bambaka afa ato fanɔkunma n anɔ ni. ⁴⁷ Na Mariya Magadalafɔ ni, ni Mariya n bo i wa la Yose ni ajina anie anɔ deke bo bu seeri Yesu ni.

16

Kabo Yesu tengeeri i yiwee n nu ni

¹ Na naaso sanɗa bo Njumiyi cɛɛn n asin ni, na Mariya Magadalafo ni, ni Salome, ni Mariya n bo i wa la Yakobo ni, aba ato tulaaleɛ nvanvani ka bu fa ko go Yesu njuniɛ n su. ² Na Yudafom bakue n bumboori, mone cɛɛn ngarama fuun, fa ko wie tie sanɗa, na ba ko Yesu fanɗunma n su. ³ Sanɗa bo bu sukɔ ni, na ba bisa bu bengu ka, “Nma ko kundu yi yabue n bo i to fanɗunma n anɔ n ma ya?” ⁴ Deke bo i ti na bu seeri so n la ka, yabue n ti bambaka agaya. Na ba tu bu tii anie anu ka yabue n to ma anɔ ni. ⁵ Na ba wura yabue bu fanɗunma n nu anu ka gbefene be tana nu saa fomboro su, i wura tanlee fofoe yorom be, na ba yo alekutura. ⁶ Na wo se bu ka, “Ma am yo alekutura. M si ka am nienie Yesu Nazaretifo n bo bu kpamaari i baka jaanu n su n wo. Wo tenge i yiwee n nu. I wo ma fen. Am nie, deke bo bu faari i seeri n yaa. ⁷ Am kpie am nyi na am ko se Petoro ni nyingam n kere ka wo du am mo sukɔ Galili, do ye am ko nu i a, dama kabo i yo seeri am lee.” ⁸ Na ba fite fanɗunma n nu ni njmatiiri, na bu njuniɛ subobo bu ni sere. Ba bo ma su ase ma be, dama sere ati bu agaya.

Kabo Yesu faari i nu kereeri Mariya Magadalafo ni

[⁹ Mone cɛɛn ngarama fuun ye Yesu tengeeri i yiwee n nu a. I du mo yiiri i nu kereeri Mariya Magadalafo n wo. Yiri la bara n bo Yesu fon yiiri ajini nsom i nu ni. ¹⁰ Na wo ko atu Yesu susufom ni ka bu wo ahoresaaki ni sun su, na wo se bu

ka wɔ ɲu Yesu. ¹¹ Saŋga bo i seeri bu ka Yesu atenɛge i yiwee n nu na wɔ ɲu i ni, ba de má i nɔaniɛ ni.

Kabo Yesu faari i ɲu kereeri i susufɔ nnyɔ nbem ni

¹² Nyini sin na Yesu susufɔ nnyɔ nbem afite Yerusalem miɛ kpiri n nu sukɔ aheme, na wɔ yi i ɲu akere bu, bo ba koro afa má nu nde ka yiri læɛ. ¹³ Na ba kpie bu nyi aba ase nyingam n ka ba ɲu Yesu, ama, haari ni nyini mmɔɔ, ba de má.

Kabo Yesu faari i ɲu kereeri i susufɔ buru ni kunm ni

¹⁴ Nyini kere sin na saŋga bo i susufɔ buru ni kunm n wo diire di su ni, na wɔ yi i ɲu akere bu. Na wɔ jaraki bu kabo bu ahorembaa ti kekereke ni, ni kabo ba yo má yarada ni minem bo bu ɲuuri i saŋga bo i tenɛgeeri i yiwee n nu na bu ba seeri bu ni. ¹⁵ Na wɔ se bu ka, “Am kɔ durunya n kere nu na am kɔ kan m labari kpa n kere adamande kere. ¹⁶ Na sɔnɔ kere bo i yoori m yarada, na am biɛeri i Nyeme nzue, Nyeme dé i tii ji, ama, bo ba yo má yarada ni, Nyeme dí bu jɔre na i yó bu nɛbɛɛn. ¹⁷ Na bo bu yoori yarada, bu nyá yiko bo bu koro yó ahin alekutura sam ni. Bu fá m duma fɔn yi ajinim fite minem n ɲu, na bu jójó anie barasu barasu bo bu si má bu, ¹⁸ na nzen bu taraari woom wara bu diiri nenɛge diiwa n mmɔɔ, i yó má bu pui. Bu fá bu saa nana tukpakifɔm ɲu, na bu nyá laifiɛ.”

Kabo Nyeme faari Yesu fun kɔɔri aŋgoro ni

¹⁹ Saŋga bo Mibiε Yesu jɔjɔori bu dɔ wieeri ni, na Nyεmε afa i afun akɔ angoro akɔ atana i saa fɔmbɔrɔ su. ²⁰ Na i susufɔm n akɔ deke n kεrε kɔ sukan i labari kpa ni, na Mibiε n awo bu dɔ abuka bu, na wɔ ma bu yiko, na ba yo alekutura sam bo i kere ka bu labari kpa kaanwa n kεrε ti nahɔrε wɔ.]

ΝΥΣΜΕ ΙΟΥΕ ΚΑΔΑΣΙ
The New Testament in Anufo (Chokosi)

copyright © 2009 Wycliffe Bible Translators, Inc.

Language: Anufo

Contributor: Wycliffe Bible Translators, Inc.

All rights reserved.

2020-11-13

PDF generated using Haiola and XeLaTeX on 21 Feb 2024 from source
files dated 29 Jan 2022

fe36d0e6-2a60-5e15-8d1c-8bf275389598